


EBÈLÙ, NSHAPÌTÀ

WA MWANDAMUTEKÈTE ¹

 ...dilòòlò, bwà kutèèlejakù mùdì Joyce wimba. Nukaàvwakù bamanyè ne ncishimà ànu cyètù eci anyi? Mwânà mukesè wa bakàjì awu, mmunyi mùdiyèkù mwà kukwàta biinè byònsò abi ku mwoyi's? Byà bwalu dilòòlò dyònsò ùdì ùtwimbila musambu mupyamùpyà. Mùshindù mwinè wùdiye mwà kuvùluka biinè byònsò abi's, awu's mmutù wà méeji ànù wetù wà cyà bushùwà ewu. Mukalenge àbeneshèku mwânà awu.

² Mpindyewu, mààlabà, pa dîbà ibìdì ne citùpà, ku nzùbù wa bitàlù mu Charlestown, mu Indiana. Mwanèètù wa bakàjì munanga, udi ufùma ku difwà ewu, Mwanèètù wa bakàjì Colvin, tudi tumupà kèètù kaneemu kàà ndekeelu, ku—ku nzùbù wa bitàlù ne ku lukitá, mààlabà mu mapingaja. Yèyè uvwakù ne mwoyi ànu munùdì pèènu dilòòlò edi emu awu, kàdì nyewù wàyì dyàmwàmwà dyà rìdò kunwàyà pèènu mùngà musangu. Nènku aba bònsò bàdì bàjingà kwikala mu disangisha adi abu, mòna's, tudi tubàjingilamù difika dilenga. Ncyà bushùwà ne neciikalè dikwàcisha dinène bwà fàmiyè wa Colvin, bwa kumanyakù ne tabernacle ewu, mutùbo bàya mu èkèleeziyà kùkaadi ntàntà mule, ne bikwàbò, neikalè... Tudikù bafwànyine kwikala ne disànkà dyà kunùmòna balwè kuntwaku. Ne ndi ngeela meeji ne... Mwanèètù munanga McKinney, wákayiisha ku citàlù cyà mwakùnyàanyi wa balùme, kùkaadi bidimu byàbúngì awu, yèyè ngudi ne mudimu mutàmbe bunène mu disangisha amu, ne mèmè mbandòmbe bwà ngàya kamukwàcishakù mu—mu diyiisha dyà ku citàlù adi.

³ Mpindyewu, ndi mulwè ànu pashiishe ndambù, dilòòlò edi. Ndi ne byàbúngì be byà dyenza, mu mùshindù wà ne ndi mupangè too ne mwà kupita naabi. Kùdì mabiikila àbúngì be, ne njiwù yà màshinyì ne njiwù yònsò eyi, ne bantu bàbiikila, munkaci mwà kulwa. Mu mùshindù wà ne, ndi mfùma ku dyumuka ku Louisville, ànu mu mutanci mukesè ewu, bwà kwalukila mwab'ewu lukàsà, mwikàle nshiya mabiikila àdì àkèngelà kudifilakù ànu cyà bushùwà ne cyà kwandamunyiibwa, ngeela meeji, too ne mpindyewu, dilòòlò edi. Nènku mpindyewu nwatúsambidilaayikù patùdì tutùngunuka naabi apu.

⁴ Nènku mu dindà emu nci—ncìvwakù mufikè ku cyena-bwalu cyànyì—cyànyì to, ku nshapitá wa 7 wa Mukàndà wà—wà—wà Ebèlù. Nènku patùcìdì tubuululamù apa, dilòòlò edi, ndi muswè kufila dimanyisha pa bidì bitàngilá masangisha

a Mwanèètù Graham Snelling, ku nrentà kuntweku, ku ndekeelu kwà Mùsèèsù wà Brigham eku. Bu Mukalenge mwà kwanyisha, ndi muswè kwalukila mu diisàtù dilòòlò. Nènku kwòkù aku netùteekè dilòòlò kampànda ditwàyàku bu kasumbù kàà bantu batùmiibwe, dībà kampànda mu lumingu emu, bwà kamwènekelakù Mwanèètù Graham mu masangisha awu. Nènku yèyè ùdi. . .wàmba ne: “Udikkù ne musumbà mutàntàmane.” Nènku—nènku yèyè neànyishè difika dyètù, bwà dikwàcisha edi. Mwanèètù Graham Snelling, yònsò wa kunùdi utu uya mu masangisha èndè, anyì udi ujinga kuyamù awu, àdi ànu ku ndekeelu kwà Mùsèèsù wà Brigham eku. Muntu kanà yònsò ùdi mwà kunwàmbila mwaba wùdiwu. Ànu ku ndekeelu menemene kwà cipalu cyà manàyi aku, ki kùdi nrentà awu mwashila. Yèyè ùtu wànyishe didisanga dyènù nendè mu dikwàtà dyà mudimu. Bwalu, twètù bu tabernacle kaaba aka tуди balayè didisanga dyètù nendè mu dikwàtà dyà mudimu, lukàmà pa lukàmà, mutùdi tuteeta kwambulwisha.

⁵ Mpindyewu, pashiishe àbidì aa netùkafike ku, bu Mukalenge mwà kwanyisha, ku nshapità wa 11 wa Ebèlù, mu ndambù wa malòòlò emu, bu Nzambì mwà kwanyisha, ne dībà adi ndi ngeela meeji ne netùpicile kabìdi mu cikondo cyà dicyònkomoka.

⁶ Kaa, Mukalenge mmutùbènèshe mu dindà emu mu mùshindù wà dikèma, mùshindù wùdiYe mutwìcìkijile Nyumà Wendè's! Nènku mpindyewu, dilòòlò edi, tуди tutèkemena ne Yèyè neàcyènzè kabìdi; ne pashiishe mu diisàtù dilòòlò, ànu nàнку. Nènku—nènku malòòlò àndì ncìyipù awu, Mwanèètù Neville neikalè kaaba aka bwà kucyàngata buludì, mèmè mupàtùke.

⁷ Kacya ncitukù mumanyè cingìikalà mwà kwenza to, udi mufwànyine kwikala apa dībà kampànda, kàdi didì dilònda kwikala mubiikidibwe ku Californie. Nwamònu's, kwèna ànu umanya ne kwàkutùmà Mukalenge nkwpè to. Ki bwà cinyì mbinkolèle bwà kulongolola ngendu ne kwamba ne ne—netwènzè *bikampànda-bikansanga*. Ndi mwà kubanga kwenza cintu kampànda, Mukalengè ùntùma mungà mwaba. Nwamònu anyì? Pa nàнку katwèna ànu bamanyè cyènzàYe to. Kàdi: “Bu Mukalenge mwà kwanyisha,” ki mutùdi tucyàmba. Nènku ndi ngeela meeji ne tуди batùmiibwe ne mudimu, anyì bapèshìibwe dìyi ditùmà adi, mu Bible ne: “Bu Mukalenge mwà kwanyisha, netwènzè bintu *kampànda*.” Pa nàнку byòbì byenzèke ne katwàngaci bipungidi bitùdi. . .anyì katùùji bipungidi, tуди tudyùmwa ne pàmwàpa Mukalenge kàvwa muswè bwà kwenzekabì to.

⁸ Ditùkù adi, tuvwa balamiibwe, Mwanèètù Roberson ne Mwanèètù Wood ne mèmè mwinè. Kàdi tudìkonka ne: “Mbwà cinyì's?” Basòmbe mwaba awu, tutàngila mu kartà, twenda tupweka, ki twètù kwalukila buludì mu kàshinyì ku nord mu njila amu ntàntà wa kilòmèètà makùmì mwandamukùlù. Kàdi

pàanyi's ntu ngendela mu cibeeba aci kacya ànu pàncivwà ne bidimu dikùmi ne binaayi. Kàdi ndi ndikonka mûndiku mufikè ku dicyènza's. Tuvwa biimàne mwaba awu, twètù bônso bàsàtù. S'tukàadi bendèlendèle mu bibeeba abi. Batàngile buludì pa kartà, batungùnùke ne kulonda njila wa 130, tupicila mu Illinois, ki twètù kwenza kaacibèndè kakesè, katùyikù tumòna ne dîbà divwa paanyimà pèètù pamutù pàà kwikaladi kumpàlà kwètù to. Tuvwa tuya batàngile ku nord pamutù pàà ku sud. Ki katanci aka anyi, twètù kusambuluka njila, mèmè kwamba ne: "Ewu kî njila udi ukèngela to." Tutàngila kwinshì aku, ki twètù kufika ku dimòna ne, tukàavwa bapàmbùke mu njila bayè ntàntà wa kilòmeètà makùmi mwandamukùlù. Twètù kwalukila buludì. . . ? . . .

9 Dîbà adi patwàlùkidi, tuvwa—tuvwa twenda tuyiikila. Mèmè kwamba ne: "Nudi bamanyè ne mbwà cinyi anyi? Tudi. . . Mukalenge mmufwànyine kwikala mutùcingùlwile lwà eku, bwa kutwèpula ku njìwù yà mibì mu mwaba kampànda lwà kwinshì eku, civwà cifwànyine kwikala cyenze cintu kampànda mu mûngà mùshindù. Tudi bamanyè ne maalu ònsò àdi àkwàcishangana bwà dyàkalenga dyà bàdi banangè Mukalenge. Aci ki cyònsò cìdì cikèngelà bwà twètù kwikala balamè mu meeji."

10 Mpindyewu, dilòlòlò edi, tudi tubanga mpindyewu bwà kaadileesònà kakesè kàà dilongesha. Ne bu mèmè mwà kwikala. . . Ncyèna ngeela meeji ne netùfikèku to, pàmwàpa netùkùfikè dilòlòlò edi, ku. . . Ewu nshapitá munène wa dilongesha èkèleeziyà, pa byàdiikùmi. Nènku ncyena-bwalu cinène, citùdì bafwànyine kushàalapù mbingu ne mbingu, pa cintu ànu cimwèpelè aci, mwàkafutá Abraham byàdiikùmi kùdì Melekisedekè, nè kumòna ní ncyà mushinga munène.

11 Dikàpàkapà edi dìdì ditàcisha muntu paanyimà pààpa anyi? Nudi baswè bwà bàdìmanyikè anyi? Dyòdì ditàcisha muntu, òmwela lupeepèlè mumpàla, dyònsò dyà ku màkàpàkapà aa. Byòbì nàнку, elàayi ànu byanza muulu cyanàànà. Nènku, anyi kutùma ànu umwe wa ku baawisiyè, kutùma muntu kùdì mwanèètù ewu, neàkwimànyikilèdì. Nènku mèmè ntu nditàngija lwà kumpengà kwànyì; ndi ngumvwa luuyà ne mfika ku dikòpakana, dîbà adi, katanci aka, dîyi dì—dimpàta. Pa nàнку, mmwònsò munwaswà amu, nènku kacyakuntàcishakù mèmè to nànsha kakesè. Tudi baswè bwà nwènù kwikala bacyankàme mpindyewu.

Katwàkukèba bwà kwangata dîbà dyènù dipitèpìte búngì to, kàdi netùteetè ànu bwà kutàngila buludì mu Dîyi. Nènku kumpàlà kwà twètù kucyènza, twànjàayi kwakula ne MwenaDì bwà katanci kakesè.

12 Mpindyewu, Taatù wa mu Dyulu, twètù katwèna bamanyè bìdì mu cibùcilu to. Kàdi cintu cimwèpelè citùdì bamanyè

bushùwà, ne batwishìibwe, ncyà ne bintu bìmpè bìdi bìsanganyìibwa kumpàlà kwètù. Bwalu bàkafùnda ne: “Cìdì dísù kadiyi dimòne, anyì dicit kadiyi dyumvwè, anyì cìdì kaciyi cyanji kubwela mu myoyi yà bantu, cìdì Nzambi mubàtèèkèle mu cibùcilu, aba bàdì baMunangè.”

¹³ Nènku tudi tulòmba bwà Wèwè kukàngulakù màdìdiishi a Dyulu dilòlòlò edi, mu diyeebà Dyèbè, ne kutùpèèsha Dìyi Dyèbè, diikalà cintu kampàndà cyà cikumbàne, bwà kubàndishakù diitabuuja dyètu twètù bu beena Kilisto, ne kutùvwijakù batàmbe—batàmbe kushindamija bilenga pa Èvànjeeliyò, kutàmba mutùvwà patwàbwedi. Enzàku nànkù, Taatù. Swàku bwà Nyumà Mwìmpè àngatè Dìyi dyà Nzambi ne àDyàbànyìnè mwoyi ne mwoyi wònsò bilondèshile dijinga ditùdì naadi. Mu Dìnà dyà Yesù, Mwan’Èbè munanga, mmutùdì tulòmba emu. Amen.

¹⁴ Mpindyewu, mu dindà emu, bu mutùvwà bashiile mu mvensà wa ndekeelu wa nshapità mwi6, nènku tudi mwà kubwela buludì mu wa 7.

Mwaba wùdì mudyànjididi mubwelè pa kaaba kèètù, Yesù mene, muvwijìibwe mwakwidi munène bwà kashidi, wa mu mulongo wà Melekisedekè.

¹⁵ Nènku netùbalè mvensà yisàtù yà kumpàla, anyì mvensà yìbìdì yà kumpàla ayi, anyì, mvensà yisàtù yà kumpàla ayi’s wè, yà nshapità wa 7, bwà twètù kubanga dyàkàmwè.

Bwalu Melekisedekè ewu, mfumu wa Salemà, mwakwidi wa Nzambi mutàmbe bunène wa mu dyulu, wàkatwilangana ne Abraham pàvwàye wàlukila ùfùmìna ku dishebeya dyà bamfùmù awu, ne kumubèneshayè;

Yèyè kàbìdì uwa Abraham mupèèshè cyàdiikùmì cyà byònsò, (byàdiikùmì byènù abi s’ki byòbì abi); dyàmbedi ku dyumvwija mwikàle Mfùmù wa bwakàne, . . . paanyimà pàà aci kàbìdì Mfùmù wa Salèmà, mbwena kwamba ne, Mfùmù wa ditalala;

Kàyi taatù, kàyi maamù, kàyi bankambwà, . . . anyì ntwàdijilu . . . kàyi nì nnè ntwàdijilu wa matùkù, anyì ndekeelu wa mwoyi; kàdì muvwijìibwe mufwànàngàne ne Mwànà wa Nzambi; mushààle mwakwidi kacya ànu byàtùngunuka.

¹⁶ Dìyi kaayi bulengadi! Mpindyewu nebikengelè bwà twètù kwalukila mu Dipungila Dikùlukulu, bwà kuumbula misà minène eyi. Nènku, kaa, mùshindù mwinè wùndì mèmè ewu muyinangè’s wè!

¹⁷ Nudi bamanyè’s, mu Arizona mwàmwa, kale wàwa tuvwa twenzamù bukèbìkèbì. Nènku tuvwa tubwela mu citùpà cyà buloba cyà mmwènèkelu mukumbàne, Mukalenge Mc Anally ne

mémè mwinè. Ne tuvwa tumòna mwaba wùvwà wùmwèka bu ne, mu tuumajimbà tukesè amu, mùvwà kaamukèlekeji kakesè, tudìbo bàbìikila ne “minkoloji” atu. Nènku mvwa. . . Ùvwa ùmpwekeshamù ùngambila bwà kulaaba cyanza pa lusenga ne kwenza ne “puu,” ndùpwidija. Pashiishe kulaaba cyanza kàdi kwenza ne “puu,” ndùpwidija. Kàdi mvwa ndikonka bwà cinyi ùvwa wènza nàнку. Mémè kulwa kujandula, nudi numòna’s, ne paùdi upwidija lusenga apu, nelùpeepelè. Ne byònsò, nànsha mene cyamù cyà plomb, ncipeepèle kutàmba ngòlò. Ngòlò mmuneemè kutàmba cyamù cyà plomb. Nènku paùdi upwidija, byamù bikwàbò byònsò ne lusenga ne lupwishi bìdi bibùuka biya, kàdi ngòlò yéyè ùdi ùshàala panshi. Ki bwà cinyi, wèwè mupetè tupyà tùumukilamù lwà kumutù *eku*, bìdi bileeja ne kùdi mulanjilanji wà ngòlò wà wùfùmina kuulu aku mu mwaba kampànda. Mvùla ewu mmusukùle muumùshe tupesepese etu. Pa nàнку tudi twangata mpiki ne bikwàbò, tuumbula kakùnà aku kònsò, pàmwè ne kònsò, tukèba bwà kupeta ngòlò awu. Tuvwa tutwà biinà mu buloba, tubyùmbula. Twelamù tùpatà, tubitàayisha. Tutùngunuka ne kutùdisha mitùbù ayi, tuya mu buloba too ne patùvwà tupeta, bwà kupeta mulanjilanji wà munène. Mpindyewu, ki citùdi tubiikila ne “kwenza bukèbikebi.”

18 Nènku dilòlò edi tuteetakù kwangata Dìyi dyà Nzambi, ne tukwàta naaDì mudimu ku bukolè bwà Nyumà Mwìmpè, bwà kutaayisha dibènga kucyùkà dyà maalu dyònsò ne mpatà bwà kubyùmusha mu twètù, tuntu twònsò tukesè tupeepèle tùdi ne bundundu pambìdi tùdi katùyi ànu ne nshidameenu, katùyikù ne bujitu mu nsòmbelu wetù atu, tudi baswè kutùpwidija twònsò ne kutùumusha bwà twamònakù mwà kupeta Mulanjilanji wà butùmbi ewu. Mulanjilanji awu ki Kilistò.

19 Nènku mpindyewu Nzambi àtùkwàcishèku patùdi tubala ne tulonga mu Dìyi Dyèndè apa. Nshapità yisàtù yà ndekeelu, yidi midyànjile ayi, pàmwè ne yònsò, tudi baakùlemu, bwà dyumvwa Melekisedekè, ànu ku musangu ne ku musangu.

20 Mpindyewu, ngeela meeji ne Pòlò ngudi ufla dyumvwija dijaalàme.

Bwalu Melekisedekè ewu, mfùmù wa Salèmà, . . .

“Mfùmù wa Salèmà.” Ne mumanyi wa dibàla kanà yònsò ewu wa Bible mmumanyè ne Salèmà mu bikondo byà ku cibangidilu ùvwa . . . Yelusàlèmà mu bikondo byà ku cibangidilu ùvwa ùbìikidiibwa ne “Salèmà.” Nènku Yéyè ùvwa Mfùmù wa Yelusàlèmà. Mutàngilaayi.

. . .mwakwidi wa Nzambi mutàmbe bunènè wa mu dyulu, (mbwena kwamba ne mwakwidyanganyi), wàkatwilangana ne Abraham . . .

Ndi muswè ngàngatè dilondangana dyà bankambwà Bèndè, Muntu munène ewu, bwà nwamòna mwà kumanya ne Yéyè

ùdi Nganyì, dyàmbedi, ne pashìishe nudi . . . netùtungunukè ne bwalu-bulonda abu.

. . . wàlukila ùfùmina ku dishebeya dyà bamfùmù, ne kumubèneshayè;

Yèyè nguwwa . . . nguwwa Abraham mupèeshè cyàdiikùmì, . . . dyàmbedi . . . ku dyumvwija m'Mfùmù wa bwakànè, . . .

Mpindyewu tàngilàayi: “Bwakànè.” Mpindyewu, twètù tutu ne bwakànè bwètù twètù nkààyeetù, tutu ne bwakànè bwà budìngibudìngì, tudi ne bwakànè bunyangakaja, bwà mìshindù yònsò. Kàdi kùdi bwakànè bulelèlà bùmwèpelè, ne bwìnè bwakànè abu mbùdi bùfùmìna kùdi Nzambì. Nènku Muntu ewu ùvwa Mfùmù wa bwakànè. Ùvwa mufwànyìne kwikala Nganyi?

²¹ Mpindyewu, Yèyè ùvwa Mfùmù wa bwakànè, Mfùmù wa Yelusàlèmà, Mfùmù wa bwakànè, Mfùmù wa ditalala. Yesù ùvwa ùbìkidiibwa ne: “Mwànà wa mfùmù wa ditalala.” Ne prince mmwànà wa mfùmù. Pa nàнку, Muntu ewu ùvwa Mfùmù wa ditalala; bìvwa bikèngela kwikalaYe Taatù wa mwànà wa Mfùmù wa ditalala. Nwacyùmùvù anyi?

²² Mpindyewu twànjàayi kumòna, kwangatakù dilondangana dyà bankambwà Bèndè kumpàla aku ndambù, bwà tùmone kutùyaaya.

Kàyi taatù, . . .

Mpindyewu, Yesù ùvwa ne Taatù. Nudi nwitabuuja nàнку anyi? NcivwàYe cyà bushùwà.

. . . kàyi maamù, . . .

Yesù ùvwa ne maamù. Kàdi ewu Muntu kàvwa ní nnè taatù ní nnè maanù to.

. . . kàyi bankambwà, . . .

Yèyè kàvwakù ne kampànda wa ne nkùvwàYe mufùmìne to, nkambwà nànsha umwe. Ùvwa Yèyè ànukù. “Kàyi nkambwà to.”

. . . kàyi ní nnè ntwàdijilu wa matùkù, . . .

Kàvwakù Yèyè ne cikondo cyà ne ncyàkabangàYe to.

. . . anyì ne ndekeelu wa mwoyi; . . .

KaCivwakù mwà kwikala cìngà cintu to ànu Nzambì. Ki cyònsò civwàCi mwà kwikala.

²³ Mpindyewu, mpindyewu bu nwènù mwà kumòna patùdi tubala mvensà udi ulonda awu apu. Nwamònu anyi? “Dyàmbedi, ku dyumvwija, mwikàle Mfùmù wa bwakànè.” Kí ng’aku kùndi muswè kubala to. Mvensà mwi—mwi3:

. . . anyì ndekeelu wa mwoyi; kàdi muvwijùbwe mufwànàngane ne Mwànà wa Nzambì; . . .

Mpindyewu, Yèyè kàvwa Mwànà wa Nzambi to, bwalu, bu ne Ûvwa Mwànà, Ûvwa ne ntwàdijilu. Kàdi ewu Muntu kàvwa ne ntwàdijilu to. Bu ne Ûvwa Mwànà, bìvwa bikèngela kwikalayè ne taatù ne maamù. “Kàdi ewu Muntu kàvwa nî nnè taatù nî nnè maamù to. Kàdi Wàkavwijiibwa *mufwànàngàne ne Mwànà wa Nzambi.*”

. . . *mushàale mwakwidi wa kacya ànu byàtùngunuka.*

²⁴ Mpindyewu, Docteur Scofield yèyè, ùdi ùteeta kwamba ne: “Cìvwa mbwakwidi, bùbìlkidiibwa ne: ‘Bwakwidi bwà Melekisedekè.’”

Kàdi ndi muswè nnwàngàcìlè ànu pa ciinè aci bwà katanci kakesè cyanààna. Pìikalàbi ne cìvwa mbwakwidi, dîbà adi’s bìvwa bikèngela kwikalabù ne ntwàdijilu, ne kwikalabù ne ndekeelu. Kàdi: “Eci cyòci kacìvwa ne ntwàdijilu anyi ne ndekeelu nànsha.” Ne yèyè kí mmwambè ne wàkatwilangana ne bwakwidi kampànda to. Wàkatwilangana ne Muntu, ne wàkabiikila Dìnà Dyèndè ne m’“Melekisedekè.” Ûvwa Muntu, kàyi dìngumba to, kàyi bwa—bwa—bwakwidi anyi buutaatù to. Kakùyi mpatà to Ûvwa Muntu Dìnà ne m’Melekisedekè, uvwa Mfùmù wa Yelusàlèmà awu. Kaciyi bwakwidi to, kàdi Mfùmù wa kàyi ne taatù to. Bwakwidi kabùtu ne taatù to. “Kàdi Muntu ewu kàvwa ne taatù, kàvwa ne maamù, kàvwa ne ntwàdijilu wa matùkù anyi ndekeelu wa mwoyi to.” Mpindyewu, Mwànà wa Nzambi . . .

²⁵ Ewu ùvwa Nganyì, ewu ùvwa Yèhowàh. Ewu ùvwa Nzambi wa Bukolè bwònsò Yèyè mwinè. Kacìvwa mwà kwikalà mukwàbò to.

²⁶ Mpindyewu mònayyaaku: “Ùdi ùshààla kashidi.” Ùdi ne bujaadiki kaaba aka ne: “Ùdi ne mwoyi. Kàtukù ùfwa to.” Kacya Kàvwakù . . . Kàvwakù cìngà cintu to ànu wa mwoyi. “Yèyè ùdi ùshààla kashidi.”

²⁷ Mpindyewu, Yesù wàkavwijiibwa, mufwànàngàne Nendè. Mpindyewu, cìdì cyènza ne kwikalè dishìilangana pankaci pàà Nzambi ne Yesù: Yesù ùvwa ne ntwàdijilu; Nzambi kàvwa ne ntwàdijilu to. Melekisedekè kàvwa ne ntwàdijilu to, kàdi Yesù ùvwa ne ntwàdijilu. Kàdi Yesù wàkavwijiibwa, mufwànàngàne Nendè. “Mwakwidi, ùshààla kashidi.”

²⁸ Mpindyewu, pàvwà Melekisedekè pa buloba, Yèyè nànsha bìshi ùvwa ànu Yèhowàh Nzambi awu—awu mumwènèsha kùdì bufùki, Ûvwa pànwapa bu tèòfànì kampànda. Abraham wàkatwilangana Nendè musangu kampànda, mu ntentà wendè. Ne ànu mutwàmbì mu dindà emu ne: “Abraham wàkaMujingulula. Ne Yèyè wàkambila Abraham cìvwaYe muswè kwenza, bwalu Kàvwa muswè kushiya mupyanyi wa buloba mpofa ku bintu bìvwaYe muswè kwenza nànsha.”

²⁹ Ngànji ngiìmanèku kakesè kaaba aka, bwà kwamba ne, Nzambi ùcidi ànu ne mmwènenu umwèumwè awu bwà

Èkèleeziyà Wendè. Nwênù kanwèna bânà bàà mîdimà to. Nudi bânà bàà Bukênkè. Ne...twètù bàdì... “Bapòle mbàà disànka, bwalu bôbò nebàpyanè buloba.” Nènku Nzambi, Yêyè wâkenzela—wâkenzela Abraham maalu awu awu, yêyè uvwa ne cyà kupyàna buloba awu... Ki kwambaYè ne: “Ncyâkusokoka muntu wîkala mwà kupyàna buloba maalu aa to.” Ambààyaaku tûng mwàbèngàYe kusokolwela Èkèleeziyà Wendè wîkala mwà kupyàna buloba mînsokòntù Yèndè!

³⁰ Danyèlè wàkamba ne: “Mu ditùkù adi nebànyeemakane eku ne eku, dimanya nedivulanganè.” Ki kwabayè ne: “Bàà lungènyi nebàmanyè Nzambi wabò, mu ditùkù adi, ne nebènzè byenzedi byà bulòbo mu ditùkù adi. Kàdi beena lwonji kabààkumanyakù Nzambi wa mu Dyulu nànsha.” MbaMumanyè mu mmwènekèlu wa kwisùkwisù ne mu mushingà kampànda, mùdì dileesònà dyètù dyà kumpàla adi dyambè, kàdi kí mbaMumanyè mu mùshindù wà bupwàngàne nànsha.

³¹ Kàdi Nzambi ùdi mwà kukwàcila mudimu ànu ku bupwàngàne, bwalu Yêyè mmupwàngàne. Dîna Dyèndè dîbeneshiibwè! Cìdì ne cyà kwikala kajila kapwàngàne mùdì Nzambi ùkwàcila mudimu, bwalu Yêyè kèna mwà kwenzakù cîngà cintu to ànu kukwàcila mudimu ku bupwàngàne. Kèna mwà kuDitwa dikeji dyà manyaanù mu mùshindù nànsha wùmwe to. Nènku dîbà adi ki bwà cinyì Yesù wàkalwa bwà kuumusha mpèkaatù yètù, bwà twamòna mwà kupwàngajiiibwa, bwà Nzambi wàmòna mwà kukwàcila mudimu mu Èkèleeziyà Wendè. Ki mwàba ngwòwò awu wùdì mînsokòntù awu wùsanganyiiibwa.

Ki mwàba ngwòwò awu wùdì bàà pa buloba bafofòmìne. Ki mwàba ngwòwò awu wùdìbò baswè kwambila ne: “Nwajìmiji lungènyi.” Ki mwàba ngwòwò awu wùdìbo baswè kwambila ne: “Kanwèna bamanyè binùdì nwamba to.”

Mbwalu: “Maalu a Mukalenge mmakùtàkàne bwà lungènyi lwà pa buloba ebu. Kàdi maalu a pa buloba àdi a musunya bwà mwena kwitabuujà.” Pa nànkù, wèwè udi muntu mushiilàngàne, udi musòmbèle mu cipaapu cishiilàngàne. Kùcyèna kàbidì wa pa buloba ebu to. Ukàadi muumùke mu mwoyi ewu mukabwelè mu Mwoyi mupyamùpyà.

³² Ki bwà cinyì, Nzambi ùdi ùsokolwela, kí mbàà pa buloba, kí mumanyi mupilùke wa maalu a nsòmbèlu, kí mbambi bàdì balongè tùlaasà to, kàdi ng’aba bàdì badipwekèshe mu mwoyi. Bantu Bèndè bàdì bapòle abu, ki bàdìYe ùsokolwela mînsokòntù yà maalu manènè a Nzambi, kùdì bôbò abu. Nwacyùmvù anyi?

³³ Mpindyewu, mpindyewu, Abraham nguvwa ne cyà kupyàna buloba. Ku...Dimiinù dyà Abraham nkùvwà matùnga ònsò ne cyà kubèneshiibwa. Pa nànkù Nzambi kutùùlukaYè ne kwakulaYè nendè, mu mmwènekèlu wa Muntu.

Mpindyewu, Nzambi ùtu misangu yònsò ànu pa buloba. Kacya Nzambi kàtùkù muumùke pa buloba nànsha. Yèyè ànu mudidìnge muumùke pa buloba, ncyèna mumanyè ne ncinganyì cìdì cifwányine kubwènzekela to. Kàdi Nzambi ùtu misangu yònsò ànu pànwapa mu mmwènekèlu kampànda. Kaa, Dîna Dyèndè ditumbè's wè!

³⁴ Yèyè ùwà ne bânà mu cipèèlà, pàvwàbo bápàtuka mu Èjiiipitù apu, mu mmwènekèlu wa Bukènkè. Wàkaakula ne Abraham mu mmwènekèlu wa Muntu. Wàkaakula ne Mòsà mu mmwènekèlu wa Muntu. Wàkaakula ne Èkèleeziyà mu mmwènekèlu wa Muntu, Mwan'Èndè, Kìlistò Yesù.

Ne Yèyè ùdi munkaci mwà kwakwila ku Èkèleeziyà Wendè leelù ewu, wàkwila ku Èkèleeziyà mulaaba wa Nzambi udi ne mwoyi, ku mabùngù a diima. “Nwènu nudi matàmbà. Mémè ndi mwonji wà Mvinyò.” Nzambi ùcìtu ànu wàkula, ne bàà pa buloba bàdi bàmòna Yesù panùdì nwènu nuMuleeja. Mùshindù awu ki wùdì bàà pa buloba bàmòna. . . “Nwènu nudi mikàndà mifùndilangana, yìdì bantu bònsò bàbala.” Nsòmbelu webè ngudi wamba cyùdì.

³⁵ Mpindyewu, Abraham udi mu njila ewu, wàlukila. Netwàlukilè bwà kubala pa bìdì bìmutàngila ànu bwà katanci kakesè cyanààna, mu Mukàndà wa Genèsè. Mu nshapìtà wa 14 wa Genèsè, ngeela meeji ne mùdici. Kaa, mùshindù mwinè wùdì bwalu abu bulenga kaaba aka's wè! Mpindyewu, tudi bònsò bamanyè bwalu bwà Abraham, mwàkamubiikilà Nzambi bwà kupàtukayè mu buloba bwà Kaasàdà ne mu cimenga cyà Ulà, ne kumwambila bwà kutàpulukayè ne beena dyèndè.

Nzambi ùtu ùbiikila balùme anyi bakàji, Ùdi ùlòmba ditàpuluka.

³⁶ Mpindyewu, ki lutàtù lùdì naalù maèkèleeziyà leelù ewu ndwòlò alu, kí mbaswè kutàpuluka ne beena kwitabuuja bàà kale bàà musuny-. . . beena bupidyà abu to. Ki bwà cinyi katwènakù mwà kutàmba kuya kule to. Tudi tubwela ànu mu nkwaka umwèpelè wa musunya awu, ne—ne twamba ne: “Kaa, Jim mmuntu mwimpè, nànsha mùdiyè ùnwà twalà. Yèyè. . . Nènku ndi nya nendè ku nzùbù wa manàyi a billard, kàdi mémè ncyèna nnàya billard ayi to. Ndi—ndi—ndi nya ne mukàji awu mu fète amu. Bòbò bàdi bènza minèkù yà bundù, ne bikwàbò, kàdi mémè wa bendè ncyèna mbyènzakù bwalà.”

³⁷ “Pàtukàayi munkaci mwàbò.” Ncyà bushùwà. “Tàpulukàayi. Kanùlengi bintu byàbò bikooyike abi to, nènku Mémè nènkwàkidilè,” mùdì Mukalenge wàmba. “Kanùdiswikidi ku cikòkedi cimwè ne beena bupidyà to, badiswikile pàmwe ku cikòkedi byà kabìyi bipetangana.” Kùcyènjiku to. Tàpulukà.

³⁸ Nènku Nzambi wàkabiikila Abraham bwà kutàpulukayè ne bònsò bàà mu cifuku cyàbò, bwà kwendayè Nendè Yèyè. Mwanèètù, mîngà misangu mbwena kwamba ne kuumuka

mu èkèleeziyà. Ki mwàkadici bwà Pòlò. Byàkakèngela bwà kuumukayè mu èkèleeziyà wendè. Ki mwàkadici bwà bààbùngi. Míngà misangu mbwena kwamba ne kuumuka kumbèlu. Míngà misangu mbwena kwamba ne kushiyangana ne tatwébè ne mamwébè, ne kushiya byònsò. Ncyèna muswè kwamba ne bidi nàнку misangu yònsò to, kàdi bitu nàнку míngà misangu. Mbwena kwamba ne bikèngela wàngatè byònsò pankaci pèèbè ne Nzambi, ne wèndè Nendè Yèyè nkààyendè. Kaa, bwobùmwe bubènèshìibwe, bwà kalolo abu, bulundà bunùdi naabù abu panùdi nutàpuluka ne bintu byà pa buloba ne beena kwitabuuja bàà musunya bàdi bàkwelulwilà abu, ne wenda nkààyebè ne Kilistò!

39 Misangu miinè búngi yínkaadi musàkìdìlèsàkìdìle Nzambi's wè! Yèyè mmwambè ne: “Mémè nènkupèèshè baataatù ne baamaamù mu cikondo cyà mpindyewu eci. Nènkupèèshè balundà ne beena dyèbè. Ne Ncyàdyàkukushìya, ne Ncyàdyàkukulekelakù to. Nànsha bu buloba bujimà mwà kukwèla nyimà, Mémè nèngèndè neebè, too ne ku ndekeelu kwà njila.”

40 Dyèsè kaayi dibènèshìibwe, dyà muntu wetù ewu wèdiibwa aku kadyòmbò bwà kulonda Mukalenge Yesù, bwà kutàpulukayè ne beena dyèndè bònsò bàà musunya abu, bwà kulonda Mukalenge! Ne muntu kanà yònsò yèyè ùmwèka bu udi kàyi ùditwàla bimpè, ne kabàyi bàdìleeja bu beena Kilistò to, kàdi munangè bintu byà musunya, mbitàmbe bwimpè bwà wèwè kwenda kukèbangana dyàkàmwè ne mwena dyèbè mukwàbò. Aci ncyà bushùwà. Ne piikalàbi ne muntu nànsha umwe kí mmuswè kwenda neebè to, kùdi Kampànda utu mulayè bwà kwenda neebè. Mbwena kwamba ne, Mukalenge Yesù mubènèshìibwe awu, Yèyè neèndè neebè.

41 Nzambi wàkambila Abraham ne: “Tàpulukà.” Kàdi bu mùvwà Abraham ànu muntu wetù ewu, kwangatayè tatwèndè e kuyayè nendè, kwangatayè mwànà wa balume wa tuutwèndè, mwànà wa mwanààbò; bònsò abu bamulembèlèle pa makaaya. Kàdi Nzambi kààkamubèneshakù to too ne pààkenzàye cìvwà Nzambi mumwambile bwà kwenza.

42 Ncyèna ngamba ne wèwè kwèna mwena Kilistò to. Apu, ncyèna nyènga muntu bwena Kilistò bwèndè to. Kàdi ndi ngamba nùнку ne, Nzambi Yèyè mukwambile cintu kampànda cyà dyenza, Kààkukubèneshakù to too ne pawàcyènzà. Mémè ndi mu cyambilu dilòlò edi ne cìmwè cyà ku bintu abi cindamàte. Masangisha àànyi kaèna mùvwàbi bikèngela kwikalawù to, munda mwà bidimu bibìdi bishààle ebi. Mbwalu ndi mwelè Mukalenge màyi ku makàsà. Wàkangambila ne: “Ndà ku Àfrikè, pashìishe ùye ku Inde.” S'ncyòci eci, cìfùnda kaaba aka mene, pa cizubu cyà paanyimà pàà Mukànda ewu, mpindyewu mene.

43 Mulongolodi wa ndongamu kumbiikilayè, kwamba ne: “Lekèlà ba-Africaans abu bàye. Inde mmudilongòlòle.”

44 Nyumà Mwímpè kutwilangana Yè naanyi, kwamba ne: “Ndà ku Áfrikè mündi Mèmè mukwambile amu.”

45 Ki cidimu cikwàbò kupitaci. Kàdi balongolodi bàà ndongamu. . . Nkààvwa muCìpwa mwoyi. Yèyè ne: “Tuyààya ku Inde. Tickets yikaadikù mwab’ewu.”

46 Mèmè kwasa lwendu kuya, kuCìpwa mwoyi too ne pàngààkafikà ku Lisbonne. Bufukù kampànda, apu, mèmè kwela meeji ne nkààvwa mfwà. Pàakacyàbu mu dindà mèmè kuya, mutàngile ku cyowedi, bwà kudyèlakù màyi. Kaa, ngákasaama, mu mùshindù wà nciyikù mwà kwimanyina kuulu to. Mwaba awu, Bukènkè abu bulembèlèle mu cyowedi amu, bwàmba ne: “Ngeela meeji ne Mwaba mu kwambile ne: ‘Anji ndà ku Áfrikè, dyàmbedi.’”

47 Masangisha àanyi kubangawù èndà ànu àbwicidila kakesè kakesè kubangila mwinè musangu awu. Nànsha mungààkalwà kuya ku Inde, ne bantu bìipacila cyàbìbìdì cyà mùliyò biimàne mwaba awu, kàdi aci kacivwa dyenza dyà civwà Nzambì mwambè bwà kwenza aci to. Ndi ndyùmfwà ne masangisha àanyi kaàkutuutakù dyàkalenga to pàndi nciyi ngaalukila bwà kalongolola cintu aci. Cìndi ngenza nànsha ciikàle cinyi, ànu Áfrikè, dyàmbedi, bwalu nciyi cikèngela wèwè kwenza. Ki Dìyi dyà Cyendèlèlèlè dyà Nzambì ndyòdi adi, ditèeka mwaba awu. Pàanyi’s mwaba mumanyè cimpè cyà dyenza. Kàdi bikèngela ngàalukilè. Nènku ndi ndyùmfwà ne cidimu cilwalwà eci ki cikondo cingàapàtukà mu cizubu ngenda nkalaba, ku dikwàcisha dyà Mukalenge.

48 Èvànjeeliyò wa butumbi, wa kale ukàadi mubangè kwikala wènda ùkola bitekètèbitekètè, bu mucì wà nsànga ewu, kàdi ndi ngeela meeji ne ùkaadi pa kwalabaja matàmbà èndè mpindyewu. Ndi ngiitabuuja nànkù, Mukenji munène ewu ne cintu cinène eci, Ndi ngiitabuuja ne Mukalenge neàtùfikishè ku dinyungisha buloba cyàkàbìdì bwà butumbi bwà Nzambì.

49 Bìdi bikèngela kwenza cìdì Nzambì mu kwambile bwà kwenza. Kàdi Abraham kutungunukayè buludi, mwangàte beana fàmiyè wendè muyè naabò. Úvwa mubànangè. Alu nduseke lwà buntu. Kàdi paanyimà pàà cikondo, àbìdì mmale àsàtù mmipi, tatwèndè kufwàye ne yèyè kumujiika. Pashiishe yèyè úvwa ne mwànà wa mwanàabò, ki matàndù ne makòkyanganyi kujuukabì. Kàdi, ndekeelu wa byònsò, Lotà kwenzayè disungula dyèndè ne kuyayè mu Sodomà. Nènku nudi numòna Abraham, kàakakòkangana ne Lotà to. Wàkamba ne: “Tudi bàna bàà muntu. Katwèna ne cyà kukòkangana to. Kàdi ambùlà mutù ùye luseke lwònsò lùdi muswè kuya alu. Wèwè muyè ku esètè, mèmè nènye ku wesètè. Wèwè muyè ku nord, mèmè nènye ku sud.” Ki lwidì lwà mwena Kilistò ndwòlò alu,

kwikala muswè bwà kupèèsha mukwàbò muntu luseke lùdi lutàmbe bwímpè alu. Misangu yònsò kumutèèkèlaci, ènzè yéyè disungula dyèndè.

⁵⁰ Mbwà cinyi? Cyàkafikishà Abraham ku dicyènza ncinyi? Ùwva mumanyè ne Nzambi ùwva mumulayè ne yéyè nguvwa upyàna cintu cyònsò mu kaabujimà, yéyè mwinè. Amen. Nènku, díbà adi, ntentà anyi kabutabuta kàà nzùbu, citwàtacishilà meeji ncinyi? Cintu cyònsò mu kaabujimà nyawù ncyètù twètù. “Bapòle bàdi ne disànka bwalu bóbò nebàpyanè buloba.” Cyònsò’s ncyètù twètù. Ki mùdi Nzambi mwambè. Pa nàнку pèèsha muntu awu cidì citàmbe bwímpè cyà disungula, piikalàye muswè. Pàmwàpa ki cyònsò cyàpetàye. Kàdi cyònsò ncyènù nwènù, bapyànyi bàà lupàndù ku mulayi. Cyònsò ncyènù.

⁵¹ Pa nàнку, Sarah, mukàji mutàmbe bulenga mu ditùnga amu, ùwva musòmbe kuntwaku ku luseke lwà kakùnà pàmwe ne bàyendè mùvwàbi bikèngela bwà kwenzayè. Yéyè mwikàle mushààdilé, èè, ùwva mufwànyine kwikala muvwàle nkanzu yà mishààdilé ya kàzàngulà, anyi cyònsò cinùdi baswè kuyìbiikila aci. Pàvwàbi ne, Màndàmù Lotà ùwva yéyè ùwvàla bu mwena tètè mu nzùbu tètè pambèlu. Ne bàyendè ùwva mfùmu wa cimenga. Yéyè ki uvwa mulumbulwishi uvwa musòmbèle mu ciibi cyà cimenga. Mukàjèndè ùwva ne byònsò; ùwva ùya mu tusumbù twònsò twà batedi bàà bilàmbà ne twà manàyi a twartà àvwà ènzekà mu Sodomà ne Gomòlà amu. Kàdi Sarah ùwva yéyè ne disànkà dyà kwikala ne bàyendè ne dimòna dikesè, kàdi mumanyè ne ùwva mu diswa dyà Nzambi, pamutù pàà kusànkila mabanji a, anyi, masànkà a mabanji a citùpà cìpi. Ncyà bushùwà. Ki díbà didì Nzambi ùmwènekèlangana ndyòdi adi.

⁵² Nènku dngà ditùkù, wèwè, ànu mùdibi cyà bushùwà ne udi wangata njila mubi, necikupetè dngà ditùkù. Udi mufwànyine kudyàmbidila ne newikalè ànu bímpè. Udi mufwànyine kudyàmbidila ne neupangè kunyookiibwa, kàdi kwàkupanga kunyookiibwa to. Bìdi mwà kumwèka bu ne byònsò mbibwikila, kàdi kî mbibwikila to. Nzambi mmumanyè byònsò. Yéyè mmumanyè wèwè ní udi wambilamù anyi kwèna wambilamù mu ditonda dyèbè. Yéyè mmumanyè wèwè ní udi wambilamù ne udi muMwitàbùuje ne musùngidiibwe, ne muMwitàbe, ne udi mufwè ku bintu byà pa buloba, ne udi ne mwoyi mu Kilistò. Yéyè mmumanyè aci.

⁵³ Mpindyewu, tudi tumòna Abraham, ndi muswè nùmonè nyumà mulelèlè ewu. Kaa, cintu cibènesha mu kaabujimà kaaba aka’s nngàsà. Ndi muswè bwà nùbalèku naanyi mpindyewu mu nshapità wa 14 wa Ekèsòdè, katanci kakesè cyanàànà.

⁵⁴ Mpindyewu, cintu cyà kumpàlà cyàkenzekà pààkayàbo kuntwaku, Lotà wàkapeta lutàtù. Bwà cinyi? Ùwva pambèlu pàà diswa dyà Nzambi. Kàdi wèwè mupetè lutàtù paùdi mu diswa dyà Nzambi, Nzambi ngwàkukwàcisha bwà kupàtukamù. Kàdi

wêwè mu lutàtù, pambèlù pàà diswa dyà Nzambi, kùdi cintu ànu cimwèpelè cyà dyenza, kwalukila cyàkàbìdì mu diswa dyà Nzambi.

⁵⁵ Mpindyewu, bamfùmù bônso bàakadisanga, ne bàakadifwànyikijila ne bibandabanda byà muntwamu abi bìvwa bimyamina bilenga kùdi mvùla, ne bàvwa ànu mwà kupwekamù ne kukwàta kaacimenga kakesè kàà kale kàà Sodomà aka, Gomòlà, kukàkwàta ku bukòòkeshi bwàbò. E kucyènzabò. Nènku pààkayàbo kuntwaku ne kukàkwàtabò, bààkabàkwàta e kuyabò ne Lotà.

⁵⁶ Ndi muswè bwà nùmonè Nyumà wa Kilistò mu Abraham kaaba aka. Mpindyewu mònayì mvensà wa 14.

Nènku Abraham pààkumvwàye ne mwanàabò... (Nwacyūmvù anyi?) ...mwanàabò wàkawkwàciibwa ku bupika, wàkangata byà mvità e kupèèsha basadidì bèndè balongesha, balela mu nzùbù mwèndè sungasunga, nkàmà yisàtù ne dikumi ne mwandamukùlù, ne wàkalumbatangana naabò too ne ku Danà.

⁵⁷ Kaa, meeji kaayì mabènesha a ngàsà's wè! Abraham, mwanàabò awu, nànsha mùvwàye mudishinde ku ngàsà, nànsha mùvwàye mu ngiikàdilù wa mutwè cìmpingà amu, pààkumvwàye ne maalu a pa buloba àkamubàkula, ne àkamukwàta ne kuya nendè, bwà kamushebeya, Abraham wàkena maalu ku Nyumà wa Kilistò. Wàkalwa ne wàkangata byà mvità e kupèèsha balùmè bèndè bàvwà balelela mu nzùbù mwèndè, ne wàkalumbatangana naabò, ne kubàlonda njila mujimà awu too ne ku Danà. Ne Danà mbitùpà byà ku ndekeelu menemene byà Pàlèstìnà, "Danà too ne ku Beeshèbà," kuumukila ku ntengu too ne ku ntengu mukwàbò. Nènku ncifwànyikijilu cyà Kilistò, pààkamònàYè ne maalu a pa buloba àvwa makwàte... bàvwà badishinde, kulumbatanganaYè ne mwena lukunà too ne ku ndekeelu, bwà kupetulula cisà cyà Adàmà cìvwà cidishinde.

⁵⁸ Ndi muswè bwà nùmonè mvensà udi ulonda awu, mùshindù mulenga wùdì Nyumà kaaba aka wàkwila kùdiye. Èyo, mvensà wa 15 mpindyewu.

Ki kwalukilayè ne bintu byònsò (byònsò), ne kwalukilayè kàbìdì ne mwanàabò Lotà, ne bintu byèndè, ne bakàjì kàbìdì, ne bantu.

⁵⁹ Abraham pààkalumbatanganàye ne mwena lukunà uvwa mukwàte mwanàabò awu apu, wàkamulonda njila mujimà awu mu ditungà dijimà, too ne ku Danà, ne wàkaalukila ne bintu byònsò bìvwàye mujimije mu cibùlà amu.

⁶⁰ Cimfwànyì bulenga kaayì cyà Kilistò, Uvwa muumvwile mu Dyulu ne twètù tuvwa bajimìne ne kulwaYè ne kulumbatanganaYè ne mwena lukunà awu, too ne mu ifèrnò, ne

kubàkulaYè misùùkà yìvwà mijìmine ne kwalukilaYè neetù ne kutwàlujululaYè ku cyònsò citùvwà kumpàlà kwà cibùlà! Twètù, batù bàà cimpìngà, twètù bàvwà balela bwà kwikala bânà bàà Nzambi, bàkaadi banyangakaja bashààle bânà bàà dyabùlù aba, ne bavwijiiibwe. . . bayè twenda tulonda maalu a pa buloba, ne benzènze bibi, ne banyeemàkàne ne lukùkà lwònsò mwàkenzà Lotà amu, tusùmbisha makenji ètù a bwanàabutè ne tulonda bintu byà pa buloba. Kilistò kutùùlukaYè. Nànsha mutùvwà badishinde amu; Nzambi, mumanyè kacya ku cibangidilu ne nganyì uvwa usùngidiibwa ne nganyì uvwa kàyì usùngidiibwa, ki bwà cinyì wàkatùùluka ne wàkalumbatangana ne mwena lukunà kupicila ku mwoyi, ku lufù, mu mpàlààdizù, kwobeka too ne mu ifernò. Nènku njila mujimà kuumuka mu Butumbi too ne mu ifernò, ne kukwàta ma—makolè a ifernò, ne kunyènga dyabùlù nsapi, ne kubìika ku lufù, ne kwalujulwila bukwàpànu, bwà kwikalabò cyàkàbìdì bânà bàà balùme ne bàà bakàjì bàà Nzambi.

⁶¹ Nudi numòna Nyumà mu Abraham, Nyumà wa Kilistò uvwa umushindikija awu anyi?

⁶² Mpindyewu ndi muswè bwà nùmonèku kumpàla eku ndambù, patùdì tubala apa.

Nènku mfùmù wa Sodomà wàkapàtuka bwà kutwìlangana nendè paanyimà pàà yèyè mumanè kwalukila ku dishebeya dyà mfùmù ewu Kèdòlàòmè, ne . . . bamfùmù . . . bàvwà nendè, mu cibandabanda cyà Shaawè, cìdì cibandabanda cyà mfùmù aci.

⁶³ Bààkapàtuka. Mfùmù wa Sodomà wàkaalujiibwa. Mwanààbò wa balùme wàkaalujiibwa. Bânà bààkaalujiibwa. Nènku ki bamfùmù aba bàpàtuka bwà kutwìlangana nendè. Ne, kàbìdì, ki mwaba ngwòwò ewu wùndì muswè kafika, ku diyiiisha mpindyewu. Tàngilàayi apa.

Nènku—nènku Melekisedekè, mfùmù wa Salèmà (Mfùmù wa Yelusàlèmà, Mfùmù wa ditalala) wàkalwa ne dyàmpà ne mvinyò; ne yèyè ùvwa mwakwidi wa Nzambi mutàmbe bunène wa mu dyulu.

Nènku yèyè wàkamubènesha, ne wàkamba ne: Abraham àbeneshiibwè kùdì Nzambi mutàmbe bunène wa mu dyulu, mwena maulu ne buloba:

⁶⁴ Melekisedekè, Mfùmù wa Salèmà awu, wàkaDìleeja pèndè munkaci mwà bamfùmù bakwàbò abu. Nènku mònaayi ne, mvità yikaavwa mijikè, Nyumà wa Nzambi mu Abraham, wa Kilistò, uvwa mwalùje mwanààbo uvwa mudishinde awu, ki pashiishe mumwalùjùlùle ku ngiikàdìlù wendè mujaalàme, bwà byònsò bìvwàye mujimije. Ùvwa mubyàlùje. Ne pààkenzàye nànkù, Yèyè kulwa ne dyàmpà ne mvinyò, mèèsà a Mukalenge. Kanwènaayikù mwà kumòna ne Melekisedekè awu ùvwa

Nganyì anyì? Ùvwa n'Nzambì. Wàkalwa ne mèèsà a Mukalenge, paanyimà pàà mvità.

⁶⁵ Mpindyewu túbuululàayi kàbidì, mu Maataàyi 26.26, lùkàsàlùkàsà, bwà tùmone cidi Yesù mwambè kaaba aka pa bwalu abu. Mu Mukàndà wà Maataàyi, nshapità wa 26 ku mvensà wa 26 kàbidì, tudi baswè kubala ànu ndambù kaaba aka. Èyo, Maataàyi 26.26.

Pashìishe Yesù kulwayè naabò mu mwaba wùdìbò bàbùkila ne Gològòtá, Gològòtá, anyì Getsèmanè, (ki cìndi muswè kwamba,) ne kwambilayè bayiidi bèndè ne: Sòmbaayi mwaba ewu, pàncìdì mèmè nya kuntu kwàka bwà kasambila apa.

⁶⁶ Ngeela meeji ne ndi mwangàte Mufùndù wà cyanàànà. Maataàyi, mvensà wa makùmi abìdì ne... wa 26 wa nshapità wa 26. Muntu yèye mumupeté, mumbadilèku, wèwè mwà—wèwè mwà kumupeta. Anjì indilaayi kakesè. Eci's ncifwànyikijilu cilenga be kaaba aka. Ncyèna muswè bwà cìnùpìtè to. Nyéyè ewu. Wàpetèkì, mwanèètù wa bakàjì.

Nènkù pàvwàbò munkaci mwà kudyà apu, Yesù wàkangata dyàmpà, ne wàkadibènesha, . . .

Cìvwa ncinyì? Mvità yìkaavwa mijikè.

. . . wàkadìcìbula, ne wàkadipèèsha bayiidi bèndè, ne wàkamba ne: Angàtaayi, ne dyàyi; eci mmubidi wànyì.

⁶⁷ Nwamònu Melekisedekè awu anyì? Bidimu nkàmà kumpàla, pààkatwilanganàYe ne Abraham, paanyimà pàà mvità mimanè kujika, Wàkafila dyàmpà ne mvinyò. Nènkù apa Yesù ùdi ùpèèsha bayiidi, paanyimà pàà mvità Yèndè mikolè ayi mimanè kujika, Wàkabàpèèsha dyàmpà ne mvinyò. Tàngilàayi. Tàngilàayi Dilwa dicitwalwà adi.

Ne wàkangata lupànzà, ne—ne wàkasàkidila Nzambì, ne wàkabàpèèshalù, wàmba ne: Lùnwayi nwènù bònso;

Bwalu eci mmashi àànyì a dipungila dipyadìpyà, àdì meediùbwe panshì bwà. . . mpèèkaatù ne dìlekelediùbwa dyà mpèèkaatù.

Kàdi ndi nzwàmabila ne, kubangila ku leelù ncyàkunwà mamuma a mvinyòto, too ne ku ditùkù adi d'ngàànwà neenù cyàkàbidì mu bukalenge bwà Taatù wanyì.

⁶⁸ Tudi mu mvità mpindyewu. Tudi twenda tulondangana ne mwanèètù mudishinde awu, uvwa Nzambì, kumpàlà kwà difùkà dyà dyulu ne buloba, mumòne ne mudyànjlile kulongolola ku Mwoyi wà Cyendèlèlè. Kàdi bintu byà pa buloba bimwambùle mu mvùnda biyè nendè. Mmukabwelè mu tusumbù ne mu bipidì kampànda, yèyè ne mukàjèndè, bàbànda bàpweka ne misèèsù, bànwà mfwankà ne maalà ne bàpìcisha dìbà mu dinwà dyà maalà ne mu bisànkasanka, bàteeta bwà kupeta ditalala.

Nènku Nyumà wa Kilistò munda mwètù, mùvwàYe mufwànyine kwikala mu Abraham amu, tudi bayè twenda tulondangana nendè. Biikàle ne byà mvità byònsò byà Nzambi, Banjèlò bàà Nzambi baasèè citùùdilu citùnyùlùkile, tudi bayè bwà kwaluja mwanèètù udi mudìshinde awu.

⁶⁹ Ne ndekeelu wa byònsò pààjikà mvità, netùtwilanganè cyàkàbìdì ne Melekisedekè, Nzambi àbeneshiibwè's wè, Yèyè wàkabènesha Abraham kuntu kwàka awu, ne kumupèèsha dibènesha, ne kumupèèsha dyàmpà ne mvinyò, mèèsà a Mukalenge. Ne pààjikà mvità, netùtwilanganè Nendè. Twètù bàdì bapyànyì bàà mulayi wà Abraham, bapyànyì pàmwè ne Kilistò mu Bukalenge, netùtwilanganè Nendè ku ndekeelu kwà njila, ne netwàngatè dyàmpà ne mvinyò, cyàkàbìdì, pààjikà mvità.

⁷⁰ Melekisedekè ewu Nganyì? “Ewu uvwa kàyi taatù, kàyi maamù, kàyi ntwàdijilu wa matùkù anyì ndekeelu wa mwoyi awu.” Yèyè neikalèKu bwà kufila cyàkàbìdì mèèsà a Mukalenge. Nwacyùmvù anyì?

⁷¹ Patùdì tuseemena, mu malòlò kampànda, patùdì tudìsangisha ne twangata mèèsà a Mukalenge ku byanza byà bambi, ciikàle cileejja ne tudi twitabuuja lufù, dijiikiibwa, ne dibiikà dyà ku lufù dyà Mukalenge Yesù, bwà ne cilàmbà-cikùdika aci, mubidi Wèndè mùvwàYe mudìbwikile amu, Nzambi, tudi tuwàngata, bu cileejilu ne: “Tudi bafwè ku maalu a pa buloba, ne balediibwe cyàkàbìdì ku Nyumà.” Nènku tudi twenda ne Mubidi wà Kilisto, beena kwitabuuja bònsò pàmwè.

⁷² Mvità minène ayi pààjikàyi, ne tuseemena cyàkàbìdì pàmwè ne Kilistò, netùdye mèèsà a Mukalenge pàmwè Nendè mu Bukalenge bwà Nzambi, cyàkàbìdì; ne netùdye mubidi, tùnwe cyàkàbìdì mashi a tumuma twà mvinyò, mu Bukalenge bwà Nzambi. Kaa! Ki Melekisedekè nyawù. Úvwa n'Yèyè awu.

⁷³ Mpindyewu tubalàayi ànu ndambù too ne kwinshì pa bìdì bìMutàngila kaaba aka, ne mvensà wa 18.

Nènku Melekisedekè mfùmù wa Salèmà wàkalwa ne dyàmpà ne mvinyò: . . . (Nwacyùmvù anyì?) . . . ne yèyè úvwa mwakwidi wa Nzambi mutàmbe bunène wa mu dyulu.

Ne yèyè wàkamubènesha, wàmba ne: Abraham àbeneshiibwè kùdì Nzambi mutàmbe bunène wa mu dyulu, mwena mauulu ne buloba:

Ne yèyè wàkamubènesha, . . . Ne wàkabènesha . . .

Ne Nzambi mutàmbe bunène wa mu dyulu àbeneshiibwè, yèyè udi mufile beena lukunà bèbè mu cyanza cyèbè awu! Nènku kumupèèshayè cyàdiikùmì cyà byònsò.

Wàkafuta byàdiikùmì kùdì Melekisedekè. Abraham wàkaMupèèsha cyàdiikùmì cyà bintu bipàwula.

⁷⁴ Mpindyewu ndi muswè bwà nùmonè kaaba aka mùdì Pòlò ùtúngunuka, mfla pàà kushìndamijila dileesònà dilwalwà mpindyewu edi.

Ki mfùmù wa Sodomà kwambilayè Abraham ne: Mpèèshè mémè bantu, wèwè wàngatè bintu bwèbè wèwè nkààyeèbè.

Mpindyewu, mfùmù wa Sodomà wàkamba ne: “Mpindyewu, ùngaalùjilè ànu bantu bàànyì, nènku wàngatè wèwè bintu bwèbè wèwè nkààyeèbè.”

Kàdi Abraham wàkambila mfùmù wa Sodomà awu ne: Nyewù ngèdì muulu cyanza cyànyì kùdì MUKALENGE, Nzambì mutàmbe bunène wa mu dyulu, . . .

El Elyon, “mwena mauu ne buloba,” mwaba awu.

. . . Nzambì mutàmbe bunène wa mu dyulu, mwena mauu ne buloba ne,

Ncyàkwangatakù nànsha kaabwàndà kàà ku nshinga wa cisàbaatà to, . . .

Yèyè kààkenza kàmpanyè kanène bwà kusangisha mfrangà nànsha. Uvwayè ùkèba ùvwa ànu mwanààbò uvwa mudishinde awu.

. . . ne ncyàkwangatakù kantu nànsha kàmwè kàà kùdì to, bwà kwikadi wàlwa kwamba ne: Ngààvwiji Abraham mubanji:

Pa kuumusha ànu bìdì nsongààlùmè eyi midyè, ne citùpà cìdì bwà bantu bàvwà bayè naanyì aba, . . .

⁷⁵ Mpindyewu, ndi muswè bwà nùmone ne, Abraham wàkamba ne: “Ncyàkwangatakù nànsha kaabwàndà kàà ku nshinga wa cisàbaatà to.” Yèyè kààkalwangana mvità ayi, bwà kupeta mfrangà bùngì cyanààna to. Ne mvità milelèlè kayìtu yilwibwa mu tubingilà twà citù nànsha. Mvità kayìtu yilwibwa bwà mfrangà to. Mvità yìtu yilwibwa mbwà—mbwà tubingilà, bwà mèyi-makùlù. Bantu bàtu bàlwangana mvità mbwà mèyi-makùlù. Ne pàakayà Abraham bwà kuya kangata Lotà, kàakaya bwalu ùvwa mumanyè ne ùvwa mwà kucimuna bamfùmù abu ne kwangata bintu bìvwàbo naabì to, wàkaya mu kiipàcìlà kàà “kusùngila mwanààbò.”

⁷⁶ Ne mwambì kanà yònsò udi mutùmìibwe ku disonsodiibwa dyà kùdì Mfùmù wa mu Dyulu, kàakuya bwà mfrangà to; anyì kàakuya bwà kujuula èkèleeziyà minène, anyì kàakuya bwà kusonsola màngumba to. Yèyè neàye ànu mu kiipàcìlà kàmwèpelè, ne kiine aku nkàà ne: “Kwaluja mwanààbò udi mudishinde.” Apètè dyeyà mu mulàmbù anyì kàpeci, bwèndè yèyè kakwèna dishiilangana to nànsha dikesè.

77 Mùntù ngamba ne: “Mvità milelèlèlè yìtu yìkùtudiibwa ne yìlwibwa mbwà mèyi-makùlù kàdi kí mbwà mfrangà to.” Ne balùme ne bakàji bàdi bàya bwà kashààla bàà mu èkèleeziyà ne bàbwela mu èkèleeziyà, bwà kumanyikabò, bwalu ne ba-Jones mbàà mwómò amu, anyi bàshintulula èkèleeziyà wabò bùùmuka ku kaèkèleeziyà kakesè bàya ku èkèleeziyà munène, wèwè udi ucyènta ne kabingilà kàà citù kàdi dìyi-dikùlù dyà cyà bushùwà kadyèna paanyimà pààci to. Bivwa bikèngela wèwè kwikala muswè bwà kwimana ku mwalu wà mvità.

78 Mu tabernacle ewu, pàdi maalu ànyanguka, nwènù balùme ne nwènù bakàji nunyeema nuya mu mwaba mukwàbò kampànda, anyi nupàtuka too ne pàdi dikòkangana anyi dibinduluka dikesè adi dijika, kùdi cintu kampànda cidi cibi mu dilabula dyèbè. Cyà bushùwà.

79 Apa tudi ne cilèlè kampànda. Apa tudi ne—tudi ne bulongàme kampànda. Èkèleeziyà ewu mmushindamijila pa mèyi-makùlù a Bible. Mwab'ewu kwòkù muntu kàyi wènta maalu majaanàme to, ne wèwè wela meeji ne kèna wènta maalu majaanàme, ndà kùdiye ùyiikilè nendè. Wèwè kùyi mwà kumupungisha to, díbà adi angàtà mwanèètù kampànda, umwe anyi bakwàbo bàbidi. Díbà adi yèyè kàyi muswè kupungishiibwa to, díbà adi ambilà èkèleeziyà. Nènku èkèleeziyà neàmwpàtè, kàyi kàbidi nendè mu bwobùmwè to. Ne Yesù mmwambè ne: “Cyònsò cinùkàsùùlulu pa buloba, Mèmè nèncisùùlùlè mu Dyulu.”

80 Kì bwà cinyi nudi ne ntàtù búngì cyanààna, mbwalu kanwèna nulonda mèyi-makùlù a Bible to. Muntu mu èkèleeziyà yèyè ùjuula cimvundu, anyi cintu kampànda cyènda bibi, kí mmudimu wèbè bwà kuya wenda wakula bwà mulùme awu anyi mukàji awu to. Mmudimu wèbè wà kuya kùdi mulùme awu anyi mukàji awu, bwà kumwambila cilètà cyèndè. Kàdi yèyè kàyi muswè kukutèeleja to, angàtà mukwàbò muntu ùye nendè. Yèyè kàyi muswè kutèeleja awu to, díbà adi èkèleeziyà àmusùùlùlè. Yesù mmwambè ne: “Cinùdi nusùùlulu pa buloba, Mèmè nèncisùùlùlè mu Dyulu. Cinùdi nuswika pa buloba, Mèmè nènciswikè mu Dyulu.” Kì bukolè bwà èkèleeziyà mbwòbù abu.

81 Àbidi àdi panshi aa muneemu emu, mulundà wanyi muyiishi mwimpè, ùvwa ne mwanèndè wa balùme, ne mwanèndè wa balùme awu ùvwa ùya mu èkèleeziyà, èkèleeziyà wèndè sungasunga awu. Kufikayè mu mshindù wà mubangè kwenda ne mwàna mukesè wa bakàji uvwa unwà mfwanga ne ùnwa maalà ne wènta maalu a lukutukutu. Muyiishi awu kwambayè ne: “Mu bushùwà bwà bwalu, aci ncimutàngile.” Mulundà wanyi wa katàpùlù-katèeka, ne nsongàalùmè mulenga maalu. Kàdi mukalamàkàne mu mananga ne nsongàakàji kampànda; ne mwinè awu ùkaavwakù musèdiibwe, mulelè ne bàna ndambù, bàyendè mucikàle ne mwoyi. Ùvwa ùciina ne nkwepi kwàlwàbo kupeta. . . nsongàalùmè awu mufwànyine wàmusèla.

Pa nàнку, mwanèètù awu ùwva muumvwè maalu mamutondè. Ki kungambilayè ne: “Mwanèètù Branham, ndi muswè bwà wèwè ùyekù kùdi mwanàànyì wa balùme *kampànda* ewu. Ndi muswè bwà ùyiikilèku nendè.”

⁸² Mémè ne: “Mwanèètù. . .” Nkààvwa mwambà kumutèèla dìnà. “Wèwè ngudi ne mùshindù mutàmbe bwímpè. Kùntùmu mémè to. Nsongààlùmè awu yèyè kàyì ne nsòmbelu mwímpè to, ne èkèleeziyà mumumòne wènza bibi, díbà adi èkèleeziyà’s ngudi ne cyà kukwàta awu mudimu. Abu bwalu mbwà kushiila èkèleeziyà. Nènku èkèleeziyà àye àkamwambilè.”

⁸³ Ki kwangatayè mwanèètù wa balùme *kampànda*, kuyabò kamwambila. Ki kwalukilayè kùdi mwanèètù awu, kumwambilayè ne ùwva wèndela yèndè, ne yèyè àkendèlè pèndè yèndè. Kwangatayè mukwàbò mwanèètù, bàbìdi bakwàbò, balami bàbìdi kuyabò kambila nsongààlùmè awu. Kàyikù mwà kucitèèleja to. Kucyàmbilabò èkèleeziyà. Kàdi kàyikù ùlwa to malòòlò mulongolongo, bwà kupungishiibwayè ne èkèleeziyà paanyimà pàà bamanè kwambila èkèleeziyà mpèkaatù wèndè awu. Pashiishe, èkèleeziyà kumusùululayè.

⁸⁴ Ki bu ngondo mujimà kuumukila apu yèyè kutuucika ne disaamà dyà bisùlùsùlù, ne ngàngàbukà kwambayè ne: “Kakwènakù mpùngà wa kwikalayè ne mwoyi pa buloba to.” Díbà adi ki kwalukilayè wènda ùkalaba. Nzambi’s mmumanyè mwà kucyènza.

⁸⁵ Twètù tutu tuteeta bwà kucyènza mu twètù ne, “Kaa, s’bivwa bikèngela nwènù kwipata *Kampànda* mu èkèleeziyà. S’bivwa bikèngela nwènù kwenza *cikampànda*, *cikansanga*, anyì *cikankènga*.” Nukààdikù nwènù benzè wènù mudimu bu èkèleeziyà pa bwalu abu anyì? Ki bwalu mbwòbù abu’s. Ki mùshindù ngwòwò awu wà kubàfikisha ku dyalukila bènda bàkalaba, kubèèlela dyabùlu musangu *kampànda*.

⁸⁶ Cyàkambà Pólò ncinganyì bwà muntu uvwa kuntwaku musòmbè ne mukàjì wa tatwèndè awu? Kabàvwa bàfika ku dimupungisha to. Kwambayè ne: “Mwelèlaayi dyabùlù.” Tàngilàayi nùmonè cìdi cyènzekà. Kàdi mu mukàndà wàkalondà wàkafùndà Pólò, muntu awu’s wàkadilongolola. Bushùwà’s. Nzambi ùtu ne mùshindù wà kwenza maalu aa, bu twètù ànu mwà kulonda tunungu Twèndè.

⁸⁷ Cintu *kampànda* cyòci cyènda bibi mu èkèleeziyà, cyòci munkaci mwà disangisha, yònsò wa kunùdi nwènù bânà bèètù. Cyòci mu kasùmbù kàà balami, umwe wa kunùdi nwènù balami kàyì ùditwàla bímpè to, bakwàbò balami bàlwe benzè cisangilu, bàteetè bwà kupungisha mwanèètù awu, bàmwambilè cìdiye wènza aci; anyì umwe wa ku nwènù bidimba, nànsha wèwè mwikàle nganyì. Díbà adi bikèngela citwadiibwè kumpàlà kwèndè. Yèyè kàyì muswè kucyènza to, díbà adi lwàyi nwàmbilè mpaasàta. Díbà adi, ùdi

ùsùlùdiibwa ùmushiibwa mu èkèleeziyà, ne dîbà adi àshaalè bu mumpààngaanù ne mumpùblikaanò. Dîbà adi nùtangilè nùmonè mùdi Mukalenge ùmwenza mudimu pambidi pèndè. Nwamònu's, apu ki kushiishayè kwalukila. Ki pààfikàye ku dikalaba mpòpò apu. Kàdi twètù tutu tuteeta kudyènzelaçi mu twètù, nudi bamanyè's, tuteeta kwenza. . . byònsò mu mùshindù wùvwàbi bìkèngela bwà twètù kubyènza awu, mpindyewu, katwènaku tutuuta dyàkalenga to.

⁸⁸ Mpindyewu, Melekisedekè ewu, Mfùmù wa Salèmà, Mwànà wa mfùmù, Mwakwidi wa Mutàmbè bunène wa mu Dyulu, wàkatwilangana ne Abraham ne wàkamubènesha. Ne yèyè wàkaMupèèsha byàdiikùmì byèndè, Abraham mufile. Ne Yèyè ùvwa Mfùmù wa Salèmà. Ne Yèyè wàkalwa ne dyàmpà ne mvinyò, mèèsà a Mukalenge, ne wàkabipèèsha Abraham paanyimà pàà mvità, paanyimà pàakamanà bantu abu kucimuniyibwa.

⁸⁹ Mpindyewu: “Mvità yònsò,” mùntù ngamba's, “yitu yilwibwà mbwà mèyì-makùlù.” Mpindyewu, nwènù ne kamvità kakesè mu èkèleeziyà, cidi ne cyà kwikala bwà dîyì-dikùlù dijaalàme. Nudi ne cyà kwikala nulwà mvità bwà cintu cijaalàme. Ne cidimba cyònsò cyà èkèleeziyà cidi ne cyà kwenza nàнку. Mpindyewu, dilongesha edi mbwà èkèleeziyà. Ki citùdi biikàdile kaaba aka. Ki cindì mwimanyine mèmè ewu kaaba aka. Ki bwà cinyi Dîyì dyà Nzambi didikù, mbwà èkèleeziyà.

⁹⁰ Kanùlekedikù kantu nànsha kàmwè kàcyàmakana èkèleeziyà ewu kumpàla to. Kòkò kiikàlekù, nwènù mbàdi bapiile, yònsò wa kunùdi. Nènku nwènù, mu èkèleeziyà yènù mishìilèshìilàngàne, cintu kampànda cyòci cyènda bibi mu èkèleeziyà wenù, wèwè ngudi mupiile, bwalu wèwè ngudi mutàngidi wa èkèleeziyà awu. Kì mbwalu bwà mpaasàtá to. Kì mbwalu bwà kasumbù kàà balami to. Mbwalu bwèbè wèwè, wèwè muntu-nkààyà, bwà kuya kùdi mwanèètù awu ne kumòna ní udikù mwà kumufikisha ku dipungishiibwa. Kabiyi nàнку to, dîbà adi angàtá bantu bàbidi anyi bàsàtù, pashìshe wàlukilè. Yèyè kàyi muswè kutèeleja aci to, cyàmbilè èkèleeziyà. Dîbà adi yèyè ùdi wipaciibwa mu Bukalengè bwà Nzambi. Nzambi mmwambè ne: “Nwènù bamwipàte aku, Mèmè nèmmpwipàtè Kùneeku, panwikalá balondè dîyì ditùma edi.” Dîbà adi Yèyè neàmulekèlèlèlè dyabùlù bwà diibakiibwa. . . dibùtudiibwa dyà mubidi wèndè. Nènku dîbà adi neàalukilè. Ncyà bushùwà. Ki mùshindù ngwòwò awu wà kumwaluja. Yèyè mwikàle mwànà wa Nzambi, neàalukilè. Kabiyi nàнку to, mòna's—mòna's, neàtungunukè, ne dîbà adi dyabùlù neàmütùmè mu mwaba wèndè wà Cyèndèlèlè.

⁹¹ Mpindyewu, kenzèlà kàà cyòci aci. Byòbi ne bùdi ànu mbùngà bwalu pèènù bunùdi ne muntu, apu kaayi mbishiilàngàne. Kàdi, piikalàbi ne muntu awu mmupiile! Nènku Lotà ùvwa muyè ne mutwè cimpingà, nànsha mùvwàye

mwena Ebèlù amu. Wákaya ne wàkatwà cìmpìngà. Ûvwa mu ngàsà, kàdi wàkamupangila. Nènku pààkapàtukàye... Kàdi Lotà—Lotà ùvwa musùngìdiibwe. Kanwikadikù nwela meeji ne Lotà kàvwa musùngìdiibwe to. Ûvwa musùngìdiibwe. Bwalu, dîbà dyònsò divwàye ùsanganyibwa mu mwaba mubì awu adi, Bible mmwambè, ne: “Mpèkaatù yà Sodoma yivwa yitácisha musùkà wèndè mwakàne ku ditùkù ne ku ditùkù.” Mpindyewu, mubidi wèndè wùvwa wènta cintu kampànda. Kàdi ndekeelu wèndè wàkalwa cinyi? Yéyè wàkatwàla bundù bupite. Mukàjèndè wàkandamuka dikunji dyà mukèlè. Yéyè wàkalela bânà ne bânà bèndè bàà bakàjì. Pa nàнку, nudi mwà kumòna bundù bwàkatwàlaci, bwalu yéyè wàkapangila ngàsà ne kààkadìpetululakù cyàkàbìdi to. Ki kukèngelabì bwà Nzambi kuumushaYè pa buloba.

⁹² Kàdi, nànsha nàнку, yéyè ùvwa ànu mwanèètù mudishinde, ne Abraham wàkenza ne mwèndè mwònsò mwà kwenza bwà kumwaluja cyàkàbìdi. Nènku Nyumà uvwa mu Abraham awu, n’Nyumà wa Kilistò udi mu èkèleeziyà leelù ewu ewu. Cidi mwanèètù mwenzè nànsha ciikàle cinyi, wéwè newènzè ne mwèbè mwònsò bwà kumwaluja cyàkàbìdi mu bwobumwè bwà Kilistò. Cidiye mwenzè nànsha ciikàle cinyi, nèuteetè ne mwèbè mwònsò.

⁹³ Mpindyewu, tudi baswè kumòna cyàkàbìdi kaaba aka mpindyewu, patùdi tutùngunuka ne dìleesòna dyà Melekisedekè ewu edi, Mwakwidi munène wa Salèmà, ne mwena Maulu ne buloba ewu. Mpindyewu, mwikàle dyàmbedi:

Kàyi taatù, kàyi maamù, kàyi bankambwà, kàyi nî nnè ntwàdijilu wa matùkù, anyi ndekeelu wa mwoyi; kàdi mwikàle muwijiibwe mufwànàngàne ne Mwànà wa Nzambi; mushàale mwakwidi kacya ànu byàtùngunuka.

Mpindyewu tàngilàayi. Yéyè kàvwa Mwànà wa Nzambi to, Ûvwa Nzambi wa Mwànà awu. Yéyè kàvwa Mwànà wa Nzambi to, Melekisedekè awu, kàdi Ûvwa Taatù wa Mwànà wa Nzambi.

⁹⁴ Mpindyewu, mubidi wùvwàYe naawù ewu, ngùvwàYe mufùke. Kawùvwa mupàtwila ku mukàjì kampànda to. Nènku ne mubidi mufùka awu, Yéyè kàvwakù mufwànyine. . . Mubidi kampànda wàkenzàYe, Yéyè mwinè, bwà kuDibuulula.

“Muntu nànsha umwe kèna mwà kumòna Nzambi dîbà nànsha dimwè to. Nzambi ùdi nyumà.” Mèsù a cifwakà kaàtu àmòna bintu abi to, ambà ànu ciikàle mu mmwènekèlu wa Dikunji dyà Kapyà, anyi nî ncinyi cìvwàci aci, anyi mu mmwènekèlu wa kampànda udibò bamòne mu cikèènà-kumòna. Kàdi . . . Bikèngela bwà Nzambi kuDibuululaYè mu mùshindù kampànda. Nènku Nzambi wàkaDibuulula kùdi Abraham, mu mmwènekèlu wa muntu. WàkaDibuulula kùdi Mòsà, mu mmwènekèlu wa muntu. WàkaDibuulula kùdi bânà bàà Izàlèèlà, mu mmwènekèlu wa Dikunji dyà Kapyà. WàkaDibuulula kùdi

Yone Mubàtiji, mu mmwènekelu wa nyuunyi wa nkuci. Nudi numòna's, WàkaDìbuulula mu mmwènekelu ayi.

PàvwaYè ùDìbuulula mu mmwènekelu wa Muntu apu, bu Mfùmù wa Salèrà; wa Yelusàlèrà; kàyi wa n'Yelusàlèrà wa pa buloba to, kàdi wa Yelusàlèrà wa ku Dyulu. WàkaDìbuulula mu mmwènekelu awu. Wàkavwijiibwa “mufwànàngàne ne” Mwànà wa Nzambi.

⁹⁵ Mpindyewu, byàkakèngela bwà Mwànà wa Nzambi kulwilaYè ku mukàji kampànda, bwà kufùkiibwaYè pànwapa; ku difù dyà mukàji kampànda, bwalu ku cintu cìmècimwè aci nkwàkalwilà lufù.

⁹⁶ Ne Yèyè kàvwakù mwà kulwila ku bufùki mùvwà Nzambi mwenzè ku cibangidilu amu to. Pààkenzà Nzambi muntu ku cibangidilu, mukàji kàvwa ne cyà dyanzàmù to. Nzambi wàkamba ànu ne: “Kwikalè,” ne muntu wàkapàtukila ku lupwishi. Yèyè wàkamubùkila, kakùyi mukàji nànsha umwe wa wikalakù ne cyà dyanzàmù to. Kàdi, mukàji, dībà adi cìvwa mu mulùme.

⁹⁷ Ki Nzambi kupàtwilaYè mukàji mu lubadi lwà Adàmà. Ncyà bushùwà anyi? Ne pashùshe mukàji kuyayè kalelela muntu ku dipetangana dyà mulùme ne mukàji. Pa nàнку mùshindù wùmwèpelè wùvwàku Nzambi mwà kwenza . . . Yèyè kàvwa mwà kulwa mu tèòfàni awu to. Kàvwa mwà kulwa bu Melekiseseke to. Byàkakèngela bwà kulwaYè bu Muntu, ne byàkakèngela bwà kulwilaYè ku mukàji. “Dimiinu dyèbè nedizaazè mutù wà nyòka, ne mutù wèndè newùKuzaaazè ku cikankanyi.” Nwacyùmvù anyi? Byàkakèngela bwà Nzambi kulwilaYè ku mukàji; ne Wàkalwa, pàakasòmbelàYè mu mubidi Wèndè wà Mwan'Èndè, Kilistò Yesù awu apu. “Nzambi ùvwa munda mwà Kilistò, ùpungisha bàà pa buloba ne Yèyè mwinè.” Ki kufilaYè Mashi Èndè Sungasunga bu mulàmbù. Ne kufilaYè Mwoyi Wèndè, bwà ku kajila kàà lufù, Wàmòna mwà kukusùngila ku Mwoyi wà Cyendèlèlè.

⁹⁸ Nàнку Nzambi wàkalwa dībà adi, ne Wàkavwijiibwa “mufwànàngàne ne” Mwànà wa Nzambi. Nwamònu anyi? Ùvwa m'Muntu muvwijiibwe *mufwànàngàne ne* Mwànà wa Nzambi. Mpindyewu, Kàvwa mwà kwikala Mwànà wa Nzambi to, bwalu Muntu ewu ngwa Cyendèlèlè.

⁹⁹ Mwànà wa Nzambi ùvwa ne ntwàdijilu, Ùvwa ne ndekeelu. Ùvwa ne—ne cikondo cyà dilediibwa Dyèndè, Ùvwa ne cikondo cyà lufù Lwèndè. Ùvwa ne byònsò bibìdì ntwàdijilu ne ndekeelu. Ùvwa ne bònsò bàbìdì taatù ne maamù.

¹⁰⁰ Ewu Muntu kàvwa ní nnè taatù ní nnè maamù, ní nnè ntwàdijilu anyi ndekeelu wa cikondo to. Kàdi Wàkavwijiibwa, Muntu ewu, Melekisedekè, wàkavwijiibwa *mufwànàngàne ne* Mwànà wa Nzambi.

¹⁰¹ Mpindyewu, Mwaànà wa Nzambi, pààkalwàYè pa buloba, mu mmwènekelu wa mukàji, anyi, kupìcila ku mukàji, mu

mmwènekèlu wa muntu mulùme, ne kushipiibwa, kubiiika ku lufù mu ditùkù diisâtù, mubiike bwà dibingishiibwa dyètù, mpindyewu mMushààle kashidi. Ne bu mùcìdì ànu mubidi awu mushààlekù, twètù pèètu tudi tushàalakù. Ne bwalu Yèyè wàkajuudiibwa ku lupwishi, netùjuudiibwè pèètu mu difwàngana Nendè. Ki bwalu-bulonda bwà Èvànjeeliyò mbwòbù abu. Dìna dyà Mukalenge dibeneshiibwè. Katùyi Banjèlo to, katùyi baakampàndà bàà batàmbe-mfùkilu to, katùyi ne cikùtùkùtù cyà masàlà bwà kwikala kubùuka eku ne eku to, kàdi balùme ne bakàjì, amen, biimàne mu difwàngana Nendè. Èyowà's, mukalenge.

¹⁰² Ànu múnkaadi mulondèlònde bwalu ebu, ndi mbwàmba cyàkàbìdì pa díbà edi kaaba aka. Mbumwèke bukùmbàne. Mvwa ngeela cisàku, nsùkì mitwè ku yìtaanu anyì yìsambòmbò yìdì minshàadile eyi. Ki mukàjàànyì kwambayè ne: “Billy, s'ukàadi wenda utùuka dibàla.”

¹⁰³ Mémè ne: “Kàdi ncyèna mujìmiye nànsha lumwè lwà ku yòyì to.”

¹⁰⁴ Yèyè ne: “Yìdi penyì?”

¹⁰⁵ Mémè ne: “Ngambilèbi túng kùvwàyi kumpàlà kwà mémè kuyipeta, mémè nènkwambilè kùdìyi mingindile.” Ncyà bushùwà.

¹⁰⁶ Kale wàwa mvwa bu mu—mulwanganyi wa mvità, mutuucyanganyi wa mànkòmù. Mvwa ne makàndà ne munène. Ne mvwa ndyùmvwa ne, bu nwènù mwà kuntenteka èkèleeziyà ewu paanyimà, mvwa mufwànyine kwenda mpweka nendè ne mùsèèsù mumwambùle. Ndi nnwàmbila ne, pàndì njuuka mu dindà dyònsò mpindyewu, ndi mfika ku dimanya ne kùkaadi bidimu makùmi ànyaayi ne byà mu njila bikaadi bipite. Nwamònu anyì? Ncìcyèna cìmvwà kale aci to. Ndi ngenda mpangila, ditùkù dyònsò. Pàndì ntàngila byanza byànyì ngeela meeji ne: “Tàngilà kùnu. Èè, nkàadi nkùlakàja.” Ndi ntàngila makaaya àànyì. Ndi mmòna ne ndi musàkidile bujitu bwàbùngì. Kale wàwa mvwa mvwàla mukàbà wà bunènè bwà centimètres makùmi mwandamutekète. Mpindyewu nkàadi mvwàla wà makùmi mwandamutekète ne yìtaanu. Nwamònu's, ndi nkùlakàja, ndyunda, mfyetelela.

¹⁰⁷ Ncinyì aci? S'ndi ndyà cintu cìmwècìmwè cìmvwà ne ciibidilu cyà kudyà aci. Ndi ne nsòmbelu wa mankendà kutàmba kale, cintu cìmwècìmwè aci. Kàdi Nzambì mmunkòsèle cikondo, ne ndi ne cyà kucyàkidila. Kàdi meeji mabènesha àdi ne, mu ditùkù adi, Yèyè neàmbiishè ku lufù. Ne byònsò bìmvwà pàncìvwà ne bidimu makùmi àbìdì ne bitaanu abi, ki bîngìikalà cyàkàbìdì bwà kashidi. Amen. Ki bwalu mbwòbù abu. Bukùlakàjì bùdì bùntàcisha ku cinyì? Ndi munyènge dyabùlù ditàcisha bwà aci kùkaadi bidimu ne bidimu, mumanyè eci ne, ndi muMwitàbùtùje. Kaacipòlò kakesè kàà díbà aka, s'kàdi ànu

kantu kakesè kàà kípì's, twamb'eku twamb'eku. Bu twétù ànu mwà kushààla bidimu makùmi àsambòmbò ne dikùmi, makùmi mwandamutekète, cikondo cyètù citùlaya aci, cìdi cinyì—cinyì pìikalàci kacyi dikèngà ne tunyinyinganya? Cìdi cinyì? Wèwè udikù mufwànyine kushintakaja nzùbu wa cikupi ewu ku cintu cyà butùmbi cyàcyà anyi?

108 Mòna's, Dìna dyà Mukalnge dibeneshiibwè! Cintu kampànda munda mwànyì ncitwilàngàne ne Melekisedekè awu dīngà ditùkù, ne mMwakùle ditalala munda mwànyì ne Mumpèeshe Mwoyi wà Cyendèlèlè. Ne ewu mwoyi kawèna ne mushinga nànsha mukèsè to ànu ntentà wa kuyiishilamù Èvànjeeliyò. Ndi ngamba nùnkù ne meeji matòòke ònsò, mwikàle ne Bibles yìbìdi eyi mitèeka mibuulula kumpàlà kwànyì. Bu ne Nzambi wanyì mmujikijàngàne naanyi bwà kuyiisha kwà Èvànjeeliyò, ne ncìciyi kàbìdi ne cyà kuMwenzela, ne bàna bàànyì biikàle cipimu cikùmbàne bwà kudikolela, ne Yéyè kuswà bwà kungangata mpindyewu mene, "Amen," aci's ncikòse bwalu. Eyowà's, mukalenge.

109 Mbishiilàngàne ku cinyi bu mèmè mwà kwikala ne bidimu makùmi mwandamukùlù anyi bu mèmè naabi makùmi àbìdi? Mèmè ndi pànwapa anu bwà cintu cìmwèpelè: kukwàcila Mukalenge mudimu. Kwàjiki. Mèmè mwà kutungunuka ne kuyiisha Èvànjeeliyò mùndi nyiisha mpindyewu emu, pàngiikalà ne bidimu makùmi mwandamukùlù, mbishiilàngàne ku cinyi nànsha mèmè naabi makùmi ànaayi anyi makùmi mwandamukùlù? S'kùdi bantu bààbùngì bàà bidimu makùmi mwandamukùlù dilòlò edi. Ne nekufwe bàna bààbùngì, pàdiku muntu wa bidimu makùmi mwandamukùlù wìkala ne mwoyi kutàmba bààbùngì bàà kùdìbo. Mbishiilàngàne ku cinyi? Bwalu mbwà tubingilà twèbè, méyì-makùlù èbè, kàdi twétù tudi pànwapa mbwà kukwàcila Mukalenge Yesù mudimu. Kwàjiki.

110 Bamanyè nùnkù, ne: "Mwoyi ewu ndibungi didi muntu wàmba; divwàku musangu kampànda, ne pashiishe kadiciyikù." Kàdi twétù ne Mwoyi wà Cyandèlèlè, Nzambi mmulayè ne Neàtùbiishè ku lufù. Ne netùdye Nendè mèèsà a Mukalenge pìikalà matùkù majikè, ne pàmbàYe ne: "Bwelààku mu masànkà a Mukalenge, àvwà makulongolwela kacya ku difukà dyà dyulu ne buloba."

111 Dìbà adi mbishiilàngàne ku cinyi pànwapa, nànsha twétù biikàle ne cintu anyi katùyi naaci? Nànsha twétù biikàle bàna batekète anyi nànsha biikàle bakùlákàjì, mbishiilàngàne ku cinyi? Cìdi cyà mushinga, udi mudìlongòlòle bwà kutwilangana Nendè anyi? Udi muMunangè anyi? Udikù mwà kuMukwàcila mudimu anyi? Udi muumùke mu kaabujimà ku maalu a pa buloba anyi? Ukààdikù mutwilàngàne ne Melekisedekè kacya mvità yàjika anyi?

112 Nzambi àbeneshiibwè's wè! Ne bidimu bitwè bu makùmi àbìdì ne cimwè, pâmvwà bukolè abu, dîngà ditùkù ngâkalwà mvità ne *cikampànda*, *cikansanga*, ne *cikankènga*. Ncivwa ne mùshindù wà kwamba ní mvwa muswè kwikala mutuucyanganyi wa mànkòmù, anyi ní mvwa muswè kwikala mwedi wa matèyi, anyi cilembi, cîndì muswè kwikala aci. Kàdi mèmè kutwilangana ne Melekisedekè, ne Yèyè kumpèèsha mèèsà a Mukalenge, ne kubangila ànu apu bwalu kukòshiiwbabù kashidi. Àlèluuyàh! Mèmè kuya kù luseke Lwèndè. Nkààdi ncyònkòmokela mu njila. Ne pààfikàbi ku ndekeelu wa njila, ne lufù lùntàngila mu mpàla, mùshindù wùndì ndyùmvwa mpindyewu ewu, ncyàkulùciinakù to. Nèngèndè, muswè bwà kuya mulùtàngile mumpàlà, mumanyè nùnkù ne, ndi mumanyè Yèyè Udi mufile mulayi, ncyà bushùwà, ne ndi muMumanyìnè mu bukolè bwà dibìikà Dyèndè dyà ku lufù. PààbìikilàYe bwà kupàtuka munkaci mwà bafwè, nèmpatùkè munkaci mwàbò. Ncyà bushùwà, muMumanyìnè mu bukolè bwà dibìikà Dyèndè dyà ku lufù. Mbishiiàngàne ku cinyi, nànsha mèmè mukulàkàjì anyi mwànà mutekète? Nànsha mèmè mukèsè anyi munènè? Nànsha mèmè muukùte anyi mwikàle ne nzala? Nànsha mèmè ne mwaba wà kulààla anyi nciyi naawù?

113 “Nyuunyi yìdi ne maswa, ne mikènge yìdi ne meenà, kàdi Mwànà wa muntu kèna ne mwaba wà kutèekaYè mutù to,” kàdi Pèndè's ùvwa Mfùmù wa Butùmbi.

114 Twètù's tudi bamfùmù ne baakwidi dilòlò edi. Mbishiiàngàne ku cinyi nànsha biikàle ne bintu anyi katùyi naabi? Bu mùdìbi ànu ne tudi ne Nzambi, tudi batàmbe ne bacimunyi. Tudi batàmbe ne bacimunyi. Tudi tusòmba mu Bwikadi bwà Nzambi, mu bwobùmwe bwà Nyumà Mwimpè, biikàle tudìila mèèsà a Mukalenge a Nyumà ku byanza byà Yèyè udi mufile bujaadiki ne: “Mvwa Yèyè uvwa mufwè, ne udi cyàkàbìdì ne mwoyi awu, ne Ndi ne mwoyi bwà kashidi.” Basòmbe pàmwe mu myaba yà mu Dyulu mu Kilistò Yesù. Kaa, Dìna Dyèndè dyà Cijila dibeneshiibwè! Mbishiiàngàne ku cinyi?

Ntentà anyi kabutabuta kàà nzùbu, mbwà cinyi bündi mwà kutàcishila meeji?

Bàdi munkaci mwà kungiibakila nzùbu wa bukalenge Mwàmwa!

Mulamika tunkenyà ne mbongò, ne argent ne ngólò,

Mishèètè Yèndè mmyùle tètè, Yèyè ùdi ne mabanji àdi kaàyi kwamba.

115 Ngâkatwilangana Nèndè dîngà ditùkù pâmvwà mfùmìna ku mvità. Mèmè kutèeka panshi bileeji byànyì byà bucimunyi. Ncitu mulwangàne kàbìdì mvità to kubangila ànu piinè apu; Yèyè ki ukààdi uyìndwangeena. Ndi mwimànyìne ànu pa mulayi Wèndè, mumanyè nùnkù ne, ndi muMumanyìne mu bukolè bwà dibìikà

Dyèndè dyà ku lufù. Ki cyònsò cidi ne bwalu. Cikwàbò cidi ne bwalu ncinyi?

116 Citùdi mwà kwenza ncinyi? Bwà cinyi kudyèlela meeji a ne udi mwà kusàkidila nkùbità umwe ku bule bwèbè? Bwà cinyi kutacisha meeji nsuki yèbè nànsha miikàle yà mvwàngalà, nànsha mwikàle naayi anyi kùyi naayi? Mbishiilàngàne ku cinyi? Wìkalè mukùlàkàjì, wìkalè ne nsuki yà mvya, wìkalè ne makaaya makòbàme, kwikadi naabi, mbishiilàngàne ku cinyi? Amen. Cyòci eci's cidi ànu bwà cipòòlò cyà cikondo, katùpà kìpì, kàdi Cyàcya's mbwà kashidi ne kashidi. Ne piikalà mikungùlù mileemile yà bikondo yènda yèya, bikondo byènda biya, kwàkushintulukakù to, kàdi neupicilè mu bikondo Byèndè byà Cyèndèlèlèlè bìdì kabiyi mpwilu abi. Mbishiilàngàne ku cinyi?

117 Mémè ndi ne disànkà dingi mùndi mutwilàngàne Nèndè. Ndi ne disànkà dingi mùdìYe mumpèeshe mèèsà a Mukalenge, ditùkù kampànda, Melekisedekè umwèumwè wàkatwilangana ne Abraham pàvwàye ùfùmina ku dishebeya dyà bamfùmù awu. Cyà bushùwà's. "Nzambi wa mu Dyulu," *El Elyon* awu; "NDI" munène awu, kàyi Mwà to; NDI: díbà dyà mpindyewu. "Ne Wàkamubènesha."

118 Tèelejàayi kaaba aka ànu kumpàla eku ndambù, bwà twamònakù mwà kuseemeja dìleesòná adi pabwìpi ndambù. Mpindyewu mvensà mwi4.

Mpindyewu anjì elàngànaayi meeji bunènè bùvwà muntu ewu, . . .

Ndi mémè ànu pàanyi ngeelanganapù meeji cyanàànà. "Anjì elàngànaayi meeji bunènè bùvwà Muntu ewu." Yèyè's mmutàmbe ne Mwànà wa Nzambi kule ne kule. Mwànà wa Nzambi ùvwa ne taatù ne maamù; Yèyè kàvwa naabò to. Mwànà wa Nzambi ùvwa ne ntwàdijilu wa cikondo ne ndekeelu wa cikondo; Yèyè kàvwa naabi to. Awu ùvwa Nganyi? Awu's ùvwa Tatwèndè wa Mwànà awu. S' Civwa Yèyè awu.

. . . anjì elàngànaayi meeji bunènè bùvwà muntu ewu, mu mshindù wà. . . nànsha mene nkambwà Abraham wàkamupèesha cyàdiikùmì cyà bintu bipàwula byònsò.

119 Mpindyewu tèelejàayaaku ne ntèmà yònsò.

Ne mbulelèlè ne aba bàdì bàà ku bânà bàà Lewì, bàdì bàngata mudimu wà bwakwidi abu, bàdì ne. . . diyi ditùma bwà kwikalabò bàngata byàdiikùmì byà kùdi cisàmbà bilondòshìle mikenji, mbwena kwamba ne, byà kùdi bânà bààbò, nànsha muvwàbi ne bóbò bàvwa bapàtùkile mu toonyi twà Abraham;

120 Mpindyewu tàngilàayaaku eci panwikalà baswè kumònakù cintu kampànda.

*Kàdi yéyè udi kàyi ne bankambwà batùngùnùkile . . .
kùdìbo wàkangata byàdiikùmì byà kùdì Abraham, ne
wàkabènesha ewu uvwa ne mulayi.*

121 Abraham nguwwa ne mulayi, nènku Muntu ewu wàkabènesha Abraham uvwa ne mulayi awu. Úvwa Nganyi mwinè ewu's? Bânà bàà Lewi bàvwa bàfila byàdiikùmì kùdì bânà bààbò anyi. . . Bânà bààbò mbàvwà bàbàpèesha byàdiikùmì. Bàvwa ne díyi ditùmà dyà kùdì Mukalenge bwà kwangatabò cyàdiikùmì cyà bìvwà bânà bààbò bàpeta, bwà mpetu yà byàkudya byàbò, bwalu bóbò mbàvwà ne bwakwidi. Mpindyewu, aci's cidi cyùmusha bwakwidi bwà Melekisedekè, munùdi nwènù nwamba amu, mwaba awu mene. S'ncyà bushùwà. Kàdi ewu Muntu. . . Nànsha mene ewu uvwa ne mulayi, muntu mutàmbe bunène wa pa buloba awu, Abraham, wàkatwilangana ne Muntu ewu ne wàkaMufuta byàdiikùmì. [Katùpà kàà mukàbà wà mèyi munda mutupù—Muf.] Bìvwa bìkèngela kwikala Yè mutàmbe bunène.

122 Tèèlejàayi.

*Ne kakùyikù dipanganangana nànsha dikesè to udi
mushààdìle ngudi ubèneshiibwa kùdì udi mutàmbedìle.*

Cyà bushùwà's. Tàngilàayi nùmonè ne Yèyè ùdi Nganyi.

*Kàdi kùneeku bantu bàdì bàfwa mbàdì bàngata
byàdiikùmì; . . .*

Abu ki bwakwidi bwà mu mulongo wà baakwidi ne bayiishi, ne bikwàbò. Bantu bàdì bàngata cyàdiikùmì, bàdì bàfwa. Nwamònu anyi?

*. . . kàdi kùneeku ewu udi ubyàngata, ngudibò bafidile
bujaadiki ne ùdi ne mwoyi.*

123 Bwà cinyi bùdì muntu mwà kwangata byàdiikùmì, piikalàbi ne kàvwakù ne. . . Piikalàbi ne kacya kàtukù mulediibwe to, ne kààdyàkufwàku to, ne ùvwakù kuumukila ku ntwàdijilu too ne ku ndekeelu, ne—ne kàvwakù ne taatù anyi ne maamù anyi ne nkambwà to, ne ùvwa mwena Maulu majimà ne buloba ne byònsò bidìmu, bwà cinyi ùvwa mwà kwangata cyàdiikùmì? Bwà cinyi ùvwa mufwànyine kulòmba Abraham bwà kufutayè byàdiikùmì? Nudi numòna mùdì kufuta kwà byàdiikùmì kwikàle kwà dísù dikolè anyi? Kufùta byàdikùmì ncintu cijaalàme. Mwena Kilistò yònsò mmwenzéjiibwe bwà kufuta cyàdiikùmì. Ncyà bushùwà. Kacya kacitukù cishintùlùdibwe to.

124 Mpindyewu:

*Ne mündì mwà kwamba nànkù ne, ne Lewi kàbìdì,
uvwa wangata byàdiikùmì awu, wàkafucila byàdiikùmì
mu Abraham.*

125 Mpindyewu, kaa, cintu kampànda ncyôci eci.

*Bwalu ùcìwwa mu twonyi twà tatwëndè,
pààkatwìlanganà nendè Melekisedekè apu.*

¹²⁶ Cinyi? Lewi? Abraham's ùwwa tatwëndè wa tatwëndè wa tatwëndè wa Lewi. Ne Bible mmwambè apa, ne: "Lewi wàkafuta byàdiikùmi pàvwàye mu twonyi twà Abraham." Nkòngo yìnaayi kumpàlà kwà kufikayè pa buloba, ùkaavwa ùfuta byàdiikùmi kùdi Melekisedekè. Dìna dyà Mukalenge dibeneshiibwè!

¹²⁷ Dìbà adi, nwènù bàdì kanùyì mwà kwitabuuja didyànjila-kulongolola, anyi didyànjila-kutèèka mu mudimu; kàdi apa, nkòngo yìnaayi kumpàlà mene kwà Lewi kupàtukayè mu twonyi twà Abraham, ùkaavwa ùfuta byàdiikùmi kùdi Melekisedekè. Mvw'a kujingakù twìkala ne dìbà dyà kubilondesha mu Mifundu.

¹²⁸ Bu nwènù mwà kucyàngata kuya naaci bu mùdì mu Yelèmiyà 1.4, Nzambì mmwambè ne: "Mvwa mukumanyè kumpàlà mene kwà wèwè kuvungiibwa mu difù dyà mamwébè. Ne Mèmè kukujidila ne kukutèèka mu mudimu bu mupròfetà kùdi matunga." Dìbà adi cyùdì mwà kwamba ne udikù wèwè mwenzè ncinyi? Cìndì mwà kwamba ne ndikù mèmè mwenzè ncinyi? Nzambì ngudi uleeja luse. Nzambì ùwwa mutùmanyè kumpàlà kwà difùkà dyà dyulu ne buloba.

¹²⁹ Kàvwa muswè bwà muntu nànsha umwe àbutukè to. Nànsha kakesè. Kàdi Yèyè mwikàle Nzambì, Ùwwa mumanyè ne nganyi uvwa usungidiibwa ne nganyi uvwa kàyi usungidiibwa, bwà cyanàànà Yèyè kàvwa mumanyè cintu nànsha cimwè to. Pìikalàbì ne Kàvwa mumanyè . . . Pìikalàbì ne Kàvwa mumanyè ne nganyi uvwa mwà kuya mu Dyambwibwa, kumpàlà kwà dyulu ne buloba kabìyikù byanjì kufùkiibwa to, nànkù Yèyè kì n'Nzambì to. Yèyè kàyi ne mikàlù to, Ùwwa mufwànyine . . . Ùwwa mumanyè kajijiji kònsò, lujiiji lwònsò, nkùsù yònsò, kabwasa kònsò, bìvwàku mwà kwikala pa buloba, kumpàlà kwà buloba kufùkiibwabù. Ncyà bushùwà. Ùwwa mumanyè bintu byònsò. Kumpàlà kwà difùkà dyà dyulu ne buloba, Ùwwa mutùmanyè. Bible mmwambè, ne: "Yèyè wàkatùmanya ne wàkadyànjila kutùlongolola."

¹³⁰ Twànjààyi kujikija bwalu bwà cyòci eci musàngu wùmwè. Twàlukilààyi mu Efèsò, nshapìtà wa kumpàlà. Nshapìt- . . . mwi5. Nshapìtà wa kumpàlà wa Efèsò, katanci kakesè cyanàànà. Ndì muswè kubala kaaba aka ànu katanci kakesè, bwà nùmonè mwà kuumvwa menemene ne kì ncintu kampàndà cìndì mèmè nteeta kunwàmbila to. Ncintu cìdì Nzambì ùteeta kunwàmbila. Nwamònu anyi? Mpindyewu tèelejààyi eci, ne ntèmà yònsò, nshapìtà wa kumpàlà wa Efèsò.

*Pòlò, mùpostòlò wa Yesù Kilistò ku diswa dyà
Nzambì, . . .*

Muntu umwèumwè udi mufùnde mukàndà mutùmina beena Ebèlù awu, ngudi ufùnda ewu mukàndà ewu.

. . . kùdì bansantu . . .

Ewu kî mmufùndila beena bupidyà to, kàdì mmufùndila bansantu, bàdì bajidiibw- . . . bansantu.

. . . bàdì ku Efèsò, ne kùdì beena lulamatu mu Kilisto Yesù:

Ngàsà ikalè kunùdì, ne ditalala, byà kùdì Nzambi Taatù wetù, ne kùdì Mukalenge Yesù Kilistò.

Nzambi ne Taatù wa Mukalenge wetù Yesù Kilistò àbeneshiibwè, yèyè udi mutùbènèshe ne mabènesha ónsò a nyumà mu myaba yà mu dyulu . . .

“Bilondèshìle mùdiYe . . .” Mpindyewu, tèèlejààyi ne ntèmà mpindyewu, mvensà mwi4.

Bilondèshìle mùdiye mutùsungùle twètù munda mwèndè kumpàlà kwà dífukà dyà dyulu ne buloba, . . .

“Twètù” abu mbanganyi? Ékèleeziyà.

. . . mutùsungùle twètù munda mwèndè (Kilistò) kumpàlà kwà difuka, buloba, bwà twètù kwikala bàà cijila ne katùyi ne kadyuwù kumpàlà kwèndè mu dinanga:

Mudyànjlile kutùlongolola ku ditèèkiibwa dyà bânà ku Yesù Kilistò kùdiye yèyè mwinè, bilondèshìle disànka dîmpè Dyèndè Yèyè mwine dyà diswa dyèndè,

¹³¹ Nganyi udi mucyènzè? Nzambi ngudi mucyènzè. Nzambi uvwa mumanyè kacya ku cibangidilu ne uvwà usùngidiibwa nganyi ne uvwà kàyi usùngidiibwa nganyi. Ncyà bushùwà, Yèyè kàvwa muswè bwà muntu nànsha umwe àbutukè to. Kàdi Yèyè kààkatùma Yesù pànwapa ànu bwà kumòna wèwè ní—wèwè ní uvwakù mwà kwenza maalu bu ne: “Èè, Yesù mukwàcikwètù, mèmè ndi mMuumvwila luse be. Pàmwápa ní ndikù mwà kusùngidiibwa ne kuciitàba’s.” To, mukalenge.

¹³² Nzambi ùvwa mumanyè ku cibangidilu ne nganyi uvwa usùngidiibwa ne nganyi uvwa kàyi usùngidiibwa. Pa nàнку, ki bwà cinyi, Úvwa mumanyè ne bàmwè nebàsungidiibwè, ki kutùmaYè Yesù bwà kufila mulàmbù wà kujimija naawù mpèkaatù, bwà aba bàkaavwàYe mudyànjlile kumanya. “Bwalu aba bàkaavwàYe mudyànjlile kumanya, mMubàbìikile. Ne aba bàdìYe mubìikile, mMubàbingishe. Ne aba bàdìYe mubingishe, Úkaadi (cikondo cipite) mubàtùmbishe.” Ki bwalu mbwabù’s.

¹³³ Pa nàнку udi udilama kî ngwèwè to, ngàsà wa Nzambi ngudi ukulama. Wèwè kî ngutu mudisùngile to, anyi kî ncintu nànsha cimwè cyùdì wèwè mwenzè cyà wèwè mukùmbànyine kusùngidiibwa to. Ngàsà wa Nzambi ngudi mukusùngile. Ngàsà wa Nzambi ngwàkakubìikila. Didyanjila-kumanya dyà Nzambi ndyàkakumanya. Yèyè ùvwa mumanyè ne newikalè mu èkèleeziyà ewu dilòlò edi, kumpàlà kwà dyulu ne buloba

kufùkiibwabì, pìikalàbì ne Yéyè kèna ne mikàlu. Yéyè kàyi nàнку to, Yéyè kì n'Nzambì to. Byôbì ne Ûvwa mumanyè bintu byônsò, Ûvwa Nzambì. Byôbì ne Kàvwa mumanyè bintu byônsò to, Kàvwa Nzambì to. Yéyè mwikàle Nzambì wa Bukolè bwônsò, Ûdi mwà kwenza bintu byônsò. Yéyè kàyi mwà kwenza bintu byônsò to, Kèna Nzambì wa Bukolè bwônsò to. Ki bwalu mbwôbù abu's.

¹³⁴ Pa nàнку mmunyi mùdi mwà kwamba ne ncintu kampànda cyùdi wèwè mufwànyine kwenza? Kí ncintu nànsha cimwè cyùdi wèwè mwà kwenza to. Ndinanga ne ngàsà wa Nzambì kùdi, bwà wikalè mene kaaba aka. Kí ncintu nànsha cimwè cyùdiku mufwànyine kwenza to, Nzambì ngwàkakubiikila ku ngàsà Wendè; wèwè kutèeleja, kuumvwa, kwitaba.

¹³⁵ “Èè,” mùdi wamba, “Mwanèètù Branham, aci's cidi cyènda ne maalu ikalè madilekèlèlè's.” Ncyà bushùwà nàнку. Wèwè udi mudishikàmìne. “Èè, muntu wàwa's ùdi mwà kwenza cyônsò cidiye muswè kwenza's.” Kakùyì mpatà to. Mèmè ntu ànu ngenza cìndi muswè kwenza. Kàdi wèwè mwikàle mwena Kilistò, kwèna uswà kwenza bubì to.

¹³⁶ Kùdi mwànà mukesè wa bakàjì udi musòmbe paanyimà pààpa dilòlò edi, mukàjàànyì. Ntu mumunangè ne byônsò bìdì munda mwànyì. Kàdi byôbì ne mvwà mumanyè ne ndi mufwànyine kwenda masandi ne mukàjì mukwàbò ne kubènga kunyookiibwa, ne kuya kamwambila, ngamba ne: “Meda, ndi mwenzè bibì,” nudi nwela meeji ne mvwakù mèmè ewu mufwànyine kucyènza anyì? Mèmè mumunangè mùdibi bìkèngela, ncyàkucyènzakù to. Ncyà bushùwà.

¹³⁷ Mpindyewu, anjì ambààyibì tũng bu mèmè mwà kwamba ne: “Kaa, ncyèna mwà kucyènza to. Bwalu, nènkwabìlè ne mbwà cinyì. Mmufwànyine kumbènga, ne mèmè kwikala... Kaa, mèmè ndi muyiishi. Udi umòna cidìbi bifwànyine kwenza anyì? Ncìfwànyine kunguumusha ku cyambilu, bu yéyè mwà kumbènga. ‘Mulùmè mushipè dibàkà, kaa!’ Ndi ne bânà bàsàtù; ncyèna mufwànyine kwikala ne awu meeji to. Kàdi, mulùmýànà, ndi...” Èè, byôbì mùshindù awu, ucidì wèwè ànu mwena ne ànu mikenji. Ncìtu mumusèle mwimànyine pa mikenji to. Kí ndiikala mwimànyine pa mikenji dìdì dyènza ne ngùikalè ne nsòmbelu wa lulamatu kùdiye to. Mbwalu ndi mumunangè. Kabyèna bìkèngela bwà ngènzè nì ncinyì nì ncinyì to. Ndi ncyènza ne budiswilè bwônsò bwalu ncilumbù cyà dinanga. Ne wèwè munangè mukàjèèbè, newènzè cintu cyôci cimwècimwè aci.

¹³⁸ Ne pìikalàbì ne wèwè udi munangè mukàjèèbè mùshindù awu, ku dinanga dyà *phileo*, ncinyì civwà cikèngela wèwè kwenzela Kilistò ku dinanga dyà *agapao*, dìdì ditàmbe bukolè misangu mùliyò mujimà, pawikalà cyà bushùwù munangè Nzambì? Mèmè mumanyè dilòlò edi ne mvwa mwà kupàtuka kuya kanwà maalà, mèmè mumanyè dilòlò edi ne mvwa

mwà kuya mu lunyaanya ne kwenda masandi, bu ne mwaa mumanyè, dilòlòlò edi; bu ne civwa mene mu mwoyi wànyì bwà kwenza nànkù, ne mèmè kuya kacyènzà, mumanyè ne Yèyè mmufwànyìne kumfwila luse, ncyèna mufwànyìne kucyènzà to. Ndi mMutwà mushinga wàbùngì be. Ndi muMunangè. Bushùwà's. Cyà bushùwà.

¹³⁹ Ki bwà cinyì ncyènakù mufwànyìne kusùmbisha dilabula dyànyì kùdì dīgumba nànsa bàmba ne ndyà bishi to, (to, mukalenge), nànsa Assemblées de Dieu, nànsa Église de Christ, nànsa Pèlerins de la Sainteté, ba-Méthodistes, ba-Baptistes, ba-Presbytériens, beena Kàtòlikè to. Ncyèna mufwànyìnekù kushintakaja kantu nansha kàmwè kàdìbo bafwànyìne kufila, ku dilabula edi to. Bwalu, kaditukù dilwilè kùdì muntu to. Ndilwilè kùdì Nzambi. To, mukalenge. Ncyèna mufwànyìnekù kusùmbisha bwanààbutè bwànyì ku maja a bidùndadùnda a Elvis Presley nànsa, anyì ku milongolongo yà tùshinyì twèndè twà Kàtòlikè, anyì twà, anyì, twèndè twà Cadillac, anyì ku miliyò yèndè yà ndola, ne bikwàbò, bidìye ùpeta ku ngondo ne ku ngondo yònsò abi. To, mukalenge. Ndi muMunangè Yèyè. Ne bu ne mèmè. . . Pàndì ànu muMunangè mùshindu awu, nènshaalè ne lulamatu kùdìYe. Ne piikalàbi ne Nzambi mmumbiikile ne munsungùle, Yèyè mmuteèke cintu kampànda munda mwànyì, ne ndi muMunangè.

¹⁴⁰ Ndi mvùluka Mukalenge Isler. Nwènù bònsò nudi bamumanyè, bààbùngì bàà kùnùdì nwènù bònsò. Ùkaadi mulwè apa mene, cipwità-mùnwàmfwankà mukùlumpè wa état wa Indiana; mulwè mwab'ewu, mwimbè cindaalà cyèndè. Pàakafwà mwanàànyì wa mu dibòkò, mukajàànyì ùvwa mufwè, ne bònsò bàsanganyibwa mu nkità emu. Nènku mwaa ngenda mbànda ne njila, mwelè mabòkò paanyimà, ndila mwadi. Kupàtukayè lubilu mu màshinyì èndè makesè, a kale a cisemuna awu, kulwa kungeelayè dibòkò kunshìngù, kwambayè ne: "Billy, ndi muswè nkwelèku lukonko." Yèyè ne: "Nkààdi mukuumvwèku uyiisha mu mùshindù wà wamba kudishinda mu cyambilu. Nkààdikù mukuumvwè mu masangu a njila ne bikwàbò, wamba bwalu bwà Kilistò ne mbilà mikolè." Yèyè ne: "Mpindyewu nyawù Wàngàci papa webè. Wàngàci mwanèènù wa balùme. Mubàbàkùle bònsò bàbidi ne bakufwile mu mabòkò. Ki yèyè ufwàfwa wàwa. Mukajèèbè wàfù, mukukwàte ku byanza. Ne mwanèèbè wa mu dibòkò wàfù, pèèbè munkaci mwà kuMusòka ulòmba bwà àkukwàcishè. Kàdi Yèyè kukwela nyimà. Udi wela meeji kaayi Bwèndè Yèyè?"

¹⁴¹ Mèmè kwamba ne: "Mèmè ndi muMunangè ne byònsò bìdì munda mwànyì. Yèyè muntùme mu ifernò, nèntungunukè ànu ne kuMunanga." Yèyè mmwakàne. Ncyèna ànu ngamba nànkù to; bidimu makùmi àbìdì ne bisambòmbò mbicijaadike. Ncyà bushùwà.

142 Bu wêwè mwà kuMunanga's wè! Kaciyi bu bwalu bukwenzeja to, ne: "Ncyêna mwà kwenza *cikampànda*, ne ncyêna mwà kwenza *cikansanga*" to. Udi muMunangè bikolè bipite kùyi mwà kucyènta to, bwalu Yèyè mmukusungùle. Kí ngwèwè utukù muMusungùle to, Yèyè ngudi mukusungùle.

143 Wêwè udi wamba ne: "Ntu mukèbe Mukalenge, ne mukèbe Mukalenge."

Muntu nànsha umwe kàtu ùkèba Nzambì to. Nzambì, ngutu ukèba muntu. Wêwè udi mufwànyine kwikala ukèba bwà Àkwenzèlè cintu kampànda, kàdi bikèngela Nzambì àshintulule ngiikàdìlù webè kumpàlà mene kwà wêwè kuMukèba, bwalu, wêwè udi ngènzàmpèkààtù, udi ngulube. Ncyà bushùwà.

144 Ne bàmwè bàà kunùdì bàtù bàya mu èkèleeziyà kàdi biikàle ànu ne nsòmbelu wa buumambàlà abu, nupàtuka apa nukenza bintu byònsò nàka pa buloba, kàdi biikàle ànu nwalukila nwamba ne: "Èyowà, ndi wa mu èkèleeziyà." Èè, aci's ncishìlàngàne kule ne kule ne kwikala wa Nzambì. Ncyà bushùwà. Ncyêna... Kàdi panùdì numòna bantu bènza nànkù apu, s'nudi mwà kumanya. Kaa, bóbò bàdi bidimba bîmpè byà èkèleeziyà. Aci ncilelèlè. Wêwè udi ànu mwà kutùngunuka ne kwikala cidimba cyà èkèleeziyà kàdi wenza bintu abi, kàdi kwèna mwà kwikala mwena Kilistò kàdi kwikala ubyènza nànsha.

145 Ànu mǔngǎmbì mu dindà emu, ne: "Cikòlòlò cyà kalè aci, bu ne kùvwakù cyena lubombo, ncikòlòlò." Ncyà bushùwà. Cyòci ne nkuci bìvwa bisòmbè mu bwàtù bùmwebùmwe abu, biikile pa mucì wà kwikila ànu wùmwebùmwe awu. Kàdi cikòlòlò cyà kale aci civwa ne disànka pàakacilekelelèbo, ne kupàtukaci mu Èkèleeziyà awu, bwà cyàmòna mwà kupàtuka kuya kiikila pa citàlù cifwè cyènza ne "kò, kò," ne kudyà munyìnyì wà *cikampànda* eci, kudyà munyìnyì wà kabalù, ne kudyà munyìnyì wà ngombe, ne byònsò bìvwàku abi, mùmwe disànka. Kàdi Noà pàakalekelelèye nkuci, yèyè kàakapetakù mwaba bwà bidyacilu byèndè byà makàsà to. Yèyè's ùvwa ne bukenji ànu bùmwebùmwe abu bwà kwikila pa nyama mufwè mǔvwà cikòlòlò ciikila amu, kàdi yìvwa ngiikàdìlù yìbidi mishìlàngàne. Umwe wa yòyi, ùvwa nnkuci, ànu kwìnè kwònsò aku. Yèyè ùvwa cikòlòlò, ànu kwìnè kwònsò aku.

146 Kàdi, bu nwènù mwà kumòna, cikòlòlò cyà kale aci cidi mwà kwikila pa citàlù cifwè mwab'ewu kudyà, cyàbìbìdì cijimà cyà ditùkù. Nkuci yèyè neikilè mu budimi bwà blé kudyà, cyàbìbìdì cijimà cyà ditùkù. Ne cikòlòlò necibuukè ciya kuntwaku cikadyà cyakudyà dyà nkuci, mwònsò mwàswàci kudyà amu. Ncifwànyine kudyà blé búngì bùmwe ne cikòlòlò, anyì, búngì bùmwe ne nkuci. Kàdi cyòci, cikòlòlò aci, cidi mwà kudyà cyakudyà cyà nkuci, kàdi nkuci kèna mwà kudyà cyakudyà cyà cikòlòlò to. Ncyà bushùwà.

147 Pa nànkù, mwena lubombo wa kale ùdi mwà kulwa mu èlèleeziyà, kucyònkómoka ne kwela mbilà ne kutùmbisha Mukalenge, ne kutùngunuka mùshindù awu, kàdi kwalukila buludì ne kusànkila maalu a pa buloba. Kàdi mwena Kilisto mulediibwe cyàkàbidì kèna mwà kucyènza to, bwalu dinanga dyà Nzambi didi dimwenzeja mu mùshindù wà kàyi mwà kucyènza to.

148 Nènku pawikalà mwena Kilisto ànu ku diya kashààla wa mu èkèleeziyà, ne ku dilekela kwenza kwà *cikampànda* ne *cikansanga*, kàdi dìjinga dimwèdimwè adi diikàle munda mwèbè, bìdi bìkukèngela diinyijiibwa dikwàbò. Ncyà bushùwà menemene.

149 Ne nwènù bakàji bàdi mwà kuvwàla tùpùtulù tukesè twà kale atu, ne nupàtuka naatù mu mùsèèsù emu, ne pashiishe udìbìikila mùdi “mwena kwitabuuja.” Udi mwena kwitabuuja, kàdi udi citembelu cibì cyà mwena kwitabuuja, pàmwàpa. Bu ne wèwè uvwa cyà bushùwà ne Kilistò munda mwà mwoyi wèbè, kí mbifwànyinekù kukèngela bwà wèwè kwela meeji ku bintu bu byòbì abi to. Cìdi bakàji bakwàbò bènza nànsha ciikàle cinyi, ne cìdi nsongàakàji mikwàbò yènza, wèwè udi mufwànyine kwikala mushiilàngane, bwalu udi munangè Kilistò bikolè bipite.

150 Mvwa nyiikilangana ne mukàji kampànda ditùkù adi, mu nzùbu kampànda, ki kwelayè byanza muulu mùshindù *ewu*, wàmba ne: “Révérend Branham, ndi ànu bu udi butakà, mu nzùbù mwànyì emu, ndi ngendakana ntwa eku ntwa eku.”

151 Mèmè kudyàmbidila ne: “Bundù bwèbè.” Mu nzùbu mwèbè sungasunga, nànsha wèwè usanganyiibwa penyì. Ncyà bushùwà. Vwàla bilàmbà ne enzà maalu bu mukàji, mùvwàbi bìkèngela bwà inàbànza kuvwàlayè. Bundù bwèbè. Kàdi wèwè nyawù mutùngùnùke. . . Èyowà, Bible mmwambè ne: “Wèwè munangè bintu abi, bintu byà pa buloba abi, dinanga dyà Kilistò kadyèna nànsha mene munda mwèbè to.” Kàdi wèwè munangè Mukalenge, ànu ne mwoyi wèbè wònsò, ne musùukà wèbè wònsò, ne meeji èbè ónsò, neusakè kule neebè tuntu twònsò twà kale twà manyaanù, twà bukooyà atu. Ncyà bushùwà.

152 Ne wèwè mulami, ne nwènù bakwàbò aba, bàtù bànyeemakanà pambèlu mu mùsèèsù emu aba, ne nukònyangaja nshingù nutàngila yònsò wa ku bakàji abu. Bundù bwènù; kàdi nudìbìikila pèènù munùdi “bànà bàà Nzambi.” Ndi mumanyè ne aci cìdi cyòsha pa dikòbà, kàdi mbìmpè wèwè kwoshika pa dikòbà pamutù pàà kwoshiibwa kashidi díbà adi kwàka. Nènku wèwè wenza bintu abi. . . Mpindyewu, kwèna pèebè ne cyà kwenza to piikalà mukàji ùpweka ne mùsèèsù, muvwàle bu udi kàyi muvwàle. Wèwè, piikalàbi ne udi utàngila, udi ànu ne cyà kumumòna’s, kàdi’s udi mwà kutùma mpàla ku luseke. Bible mmwambè ne: “Ewu ukàtàngidi muntu mukàji

bwà kumwalakana, wàmanyi kwenda nendè masandi munda mwà mwoyi wèndè.”

153 Ngánjì nkwabìlèku cintu kampànda, wèwè mwanèètù wa bakàji munanga, wèwè ngwàlumbulula. Nànsha byòbì ne, udi mufwànyine kwikala mukezùke mùdì cilòngò cyà mbata. Bìdì mwà kwikala cyà bushùwà ne kùtu mwanjì kwenzakù mpèkaatù wa mùshindu awu to, mpèkaatù wa masandi, kacya bàakulela. Kàdì wèwè uvwàla bilàmbà mùshindù awu, wèwè ki wàlumbulula ku Cilumbulwidi bwà dyenda dyà masandi ne muntu mulùme yònsò uvwa mukutàngile awu. Kì mùdì Bible mwambè. Nènku paùdì wenda upweka ne mùsèèsù apu, udi mupùile nganyì, mmuntu mulùme awu anyi? To, mukalenge. Ngwèwè. Wèwè nguvwa mudizànjike mùshindù awu.

154 Mukàji ùtu ne mwaba wà musinga. Mmwaba munsantu, mulenga, mwenzè ne mulòwu. Kàdì ùdì ne cyà kudilama mùshindù awu, bwà kulama mudimu wèndè awu mùvwàbì bikengela kuwùlama, bu maamù, bu muntu mukàji ne bukàji. Pàdì bukàji bùnyangakajiibwa, mufùbà wà mwongo wà ditùnga kanà dyònsò edì mmucibùke. Nènku ki bwà cinyì, leelù ewu, ditùngà dyètù ndinyangùke, mbwà nsòmbelu yà masandi yà bakàji bèètù. Ncyà bushùwà menemene. Bushùwà. Ndibola didì munkaci mwètù, ki didì dìwùcibula.

155 Cìdì cìnùkèngela nkutwilangana musangu kampànda ne Melekisedekè ewu. Amen. Yèyè—Yèyè àkubèneshè ne àkupèèshè mvinyò, dyàmpà, Mwoyi wà Cyendèlèlè. Dìbà adì neumonè maalu mùshindù mushiilàngàne. Dìbà adì newikalè. . . Nebishiilanganè. Kwàkuswà bwà nsongàlùmè kwikalayi yènza. . . yìkwela kashibà kàà dikwambisha naakù to, kashibà kàà mbwà wa diitu aku, anyi cyònsò cyùdì muswè kukàbiiikila aci. Nànsha kakesè. Newikalè mushiilàngàne.

156 Ne wèwè udi muswè kungambila ne udi uvwàla bilàmbà mùshindù awu, ne upàtuka kwàka ne, mbwà kiipàcilà kakwàbò kanà kònsò anyi? Wèwè udi wamba ne: “Mòna’s, s’mbyà bifilakù kapeepà.” Aci’s mmyanu wela. Kì mbyà bifilakù kapeepà to. Maalu a mamanya àdì àjaadika ne kì mbyà bifilakù kapeepà to. Cìdì. . . Dyalakana ndidì dikwikile, mwanèètù wa bakàji. Kwèna ufika ku dicimanya to. Ncyèna nteeta kukutàpa ku mwoyi to, kàdì ndi nteeta kukudimwija. Bakàji bààbùngì bàà ngiikàdilù mulenga, mukezùke ànu ne mwèndè mwònsò, kainàbànzà kalenga, upàtuka ne bintu abi, mu mùsèèsù, ne lungènyì lujimìne bwà kumanya cidiye wènga aci, bwalu muyiishi kampànda wa mutwè cimpingà ùdì ùciina ne nkwpèi kwàlwà bàyeebè kwikala kàciyi ùfuta kabidi byàdiikùmì byèndè mu èkèleeziyà. Yèyè wikalakù mutwilàngàne ne Melekisedekè, kì mmufwànyine kwela meeji a bintu abi to. Mmufwànyinekù kuyiisha Èvànjeeliyò. Nànsha yèyè mumwoshè mumuuvùle cisèbà cyà paanyimà, mmufwànyine kuMuyiisha anu diyiisha. Ncyà bushùwà menemene.

157 Udi ucyènza, ne udi ucyènza mbwalu nyuma wa dyalakana mmukujuukè. Ne nwènù balùme bàdi bàlekèlà bakàji bèènú bènza biinè bintu abi abu, ditèkemena dyànyì ndikesè menemene dyà ne wèwè mwinè udikù mulùme wetù ewu. Ncyà bushùwà. Ncyà bushùwà. Mpindyewu, kakwèna kàalumbandi kàa dyela pa bwalu abu to, bwalu, anyì, kakwèna dilòmbà dyà luse to, bwalu, aci ncilelèlà. Mulùme yònsò udi ulekela mukàjèndè ùpàtuka mu mùsèèsù ne wènza maalu mùshindù awu awu, mwanèètù wa balùmè, bìvwa bikèngela mene wèwè kuvwàla bilàmbà byà mukàjèèbè. Ncyà bushùwà. Wèwè, mòna's, ekèlekèle!

158 Ncyèna ngamba ne wanyì mukàji kàakucyènza to. Kàdi bikèngela ngùikalè mushintùlùdiibwe ne munyangàkàjiiibwe's, ncìyi cìndi mpindyewu eci to, mèmè ànu mudidìnge musòmbe nendè pèndè mwikàle ùcyènza. Ne aci ncyà bushùwà menemene.

Bànà bàànyì bàà bakàji, bàdi mwà kucyènza piikalàbò bàkaadi bakàji. Ncyèna ngamba ne kabàakucyènza to. Ncyèna mumanyè to. Aci nciàngile luse lwà Nzambi. Ndi ntèkemena ne kabàkucyènza to. Bòbò bacyènzè, nebàdyatakajè ku makàsà masambila a taatù mwakàne. Nebàdyatakajè ku makàsà nsòmbelu wa muntu kampànda udikù muditàcishe bwà kwikala ne nsòmbelu mujaalàme, bòbò ànu badidìnge bacyènzè. Ncyà bushùwà. Kàdi mèmè ndi muswè kwikala ne nsòmbelu mujaalàme, kulongesha cidì cijaalàme, kwikala mujaalàme, ne kubàlejaku njila wa kulonda mujaalàme. Bòbò benzè aci, nebàdisebèlèlè ku bukolè njila wa kuya mu ifernò, nebàdyatakajè dilongesha dyànyì ne nebàdyatakajè Kilstò wanyì, ne nebàdyatakajè madimwija àànyì, ncyà bushùwà, bòbò ànu badidìnge bacyènzè. Bushùwà. Ncyà bushùwà.

159 Bundù bwèbè. Wèwè ànu mudidìnge mutwilàngàne ne Kilstò, cimònààmèèsù, ne Mukubènèshe, ne mukutwè mishiku yà dikwanyisha ayi ku mwoyi wèbè aku, démons yònsò yà mu ifernò kayàakukufikishakù kàbidì ku dibìvwàla to. Ncyà bushùwà. Udi mushintùlùke muumùke ku lufù muyè ku Mwoyi, ne majinga èbè àkaadi matèèka pa bintu byà kuulu kaàyi ku bintu byà pa buloba to. Amen. Mbìmpè ndekelè bwinè bwalu abu. Mbwà bùtácishangana. Èyo. Kàdi m' Bulelèlà.

160 Èyo, patùdi twenda tuya kumpàla mpindyewu tuseemenakù ndambù apa, pashiishe netùjikijè.

*. . . mbulelèlà ne aba bàdi bàà ku bànà bàà Lewi, . . .
bàngata cyàdiikùmi cyà mudimu wà bwakwidi abu,
ne bàdi ne diyì dituma bwà kwikalabò bàngata
cyàdiikùmi cyà kùdì cisàmbà bilondòshìle mikenji,
mbwena kwamba ne, byà kùdì bànà bààbò, nànsha
mùvwàbi ne bòbò bàvwa bapàtùkile mu toonyi twà
Abraham amu;*

Kàdi yéyè udi kàyi ne bankambuà babadiibwe kùdìbo wàkangata byàdiikùmì byà kùdì Abraham, ne wàkabènesha ewu uvwa ne mulayì.

Ne ne kakùyikù dipangananganana udi mushàadìle ngudi ubèneshiibwa kùdì udi mutambidìle.

Nènku apa bantu bàdì bàfwa mbàdì bàngata byàdiikùmì; kàdi apa ewu udi ubyàngata, ngudibò bafidìle bujaadiki ne ùdì ne mwoyi. Nènku ndi . . .

Ne bu mùndì mwà . . .kwamba ne, Lèwì pende, . . . wakangata cyàdiikùmì awu, wakangata cyàdiikùmì awu, wàkafidìla byàdiikùmì mu Abraham.

Bwalu yéyè ùcìvwa mu twonyi twà tatwëndè, pààkatwilanganà nendè Melekisedekè apu.

¹⁶¹ Lwidi lùdì—lùdì naalù kùdì Kilistò nelùtambè kudileeya mùshindù kampànda pa cìikalà bânà bèèbè. Nsòmbelu ùdì nendè kumpàlà kwà dîkù dyèbè awu neadileeyè mu mùshindù kampànda pa cìikalà bânà bèèbè. Bwalu, Bible mmwambè, ne: “Yéyè ùvwa mwà kunyooka bubì bwà baledi pa bânà too ne ku lukòngò lwisâtù ne lwinâyì.”

¹⁶² Mpindyewu, ànu katanci kakesè cyanàànà, kumpàlà kwà kujikija.

Nènku ki bwà cinyi pìikalàbì ne bupwàngàne (s'ki bupwàngàne bwènu abu cyakàbidì) búvwa kù bwakwidì bwà beena Lewi, (bwalu ku bwòbù abu nk Wakapetèlà bantu mikenji,) byàkakèngediibwa kabidì bwà kulwakù . . .mwakwidì mukwàbò kujujukayè wa mu mulongo wà Melekisedekè, kàdi kàyi ubiikidiibwa mu mulongo wà Aalònà?

¹⁶³ Mikenji, mwena ne ànu mikenji awu, nwamònu's ne: “Kaa, bikèngela wènzè cikampànda. Wèwè kùyi wenza cikankènga, kwèna mwena Kilistò to. Wèwè kùyi uneemekela nsabatu to! Wèwè kùyi . . .Wèwè udyà munyiinyi! Wèwè wenza bintu kampànda!” Mmwenènu yònsò ya bwena ne ànu mikenji eyi. “Ne bidi bikèngela wikalè uya mu èkèleeziyà. Wèwè kùyi uya to, udi ufuta cibawu bwà bwalu abu. Bikèngela wènzè cijila cyà matùkù citèèmà.” Bintu abi ndukutukutu. Udi musungidiibwe nku ngàsà wa Nzambì, ku didyànjila-kumanya dyà Nzambì, ku didyànjila-kulongolola Dyèndè. Nzambì wàkabiiikila Abraham ku didyànjila-kulongolola, ku didyànjila-kumanya. Yéyè ngwàkabiiikila. Wàkakina Esawù, ne kunanga Yakòbò, kumpàlà kwà nànsha umwè wa kùdìbo kulediibwayè. Ncyà bushùwà. Didyànjila-kumanya dyà Nzambì ndidì—ndidì dìmanyà bintu ebi.

¹⁶⁴ Wèwè udi wamba dîbà adi ne: “Diyiisha dyà Èvànjeeliyò didi ne musinga ku cinyi?”

165 Mpindyewu nênkwambilè, nùnkù. Pòlò wàkandamuna ku cyòci aci, anyi n'Yesù's wè. Yesù nyewù. Wàkamba ne: “Bukalenge bwà mu Dyulu mbufwànàngàne ne muntu wàkaya ku cikampànda, ci—cijibajiba anyi dijiba, ne kumùkùpayè bukòndò. Kubùkòkayè. Mwòmù amu, wàkapeta nkùvù. Wàkapeta nkùvù yà mu misùlù. Wàkapeta nyòka. Wàkapeta misodyà. Wàkapeta ndimbà. Wàkapeta ntànda. Wàkapeta mishipa yà bidy'à bibole. Wàkapeta—wàkapeta mishipa.” Mpindyewu, muntu awu ùvwa ànu ùlòba ne bukòndò cyanààna.

166 Ki mùdi Èvànjeeliyò nànkù. S'ki cyòci eci mpindyewu, mémè ndi nyiisha Èvànjeeliyò. Ndi nkùpa ànu bukòndò cyanààna. Ndi mbùkòka, ngamba ne: “Bònsò bàdi baswè, muntu kanà yònsò, àlwe.” Ki bàmwè bàlwalwà aba, ku cyoshelu. Bònsò bàdi bàkùngwila bònsò ku cyoshelu. Bàdi bàsambila. Bàdi bèèla mbilà. Ncyèna mwà kubàsunguluja ewu ne ewu to. Aci kî ncintàngile mémè to. Ncyèna mutùmùibwe bwà kulumbulwisha to.

167 Kàdi, kùdi bàmwè muntwamu bàdi ndimbà. Kùdi bàmwè bàdi misodyà. Kùdi bàmwè bàdi nyòka. Bìdi ne, bàmwè, bàdi nkùvù. Ne kùdi bàmwè bàdi mishipa. Mudimu wànyì kî ngwà kulumbulwishangana nànsha. Ndi mémè ngamba ne: “Taatu, bìndi mukòke mbyòbò ebi.”

168 Kàdi, ludimbà lùvwa ànu ludimbà, kwinë kwònsò aku.

169 Ntànda, ntànda wa kale awu neimanè kwàka ùkènzakana, katanci kakesè, ùjôngoloja biimèsu binène abi, ùkènzakana, wàmba ne: “Udi mumanyè mùdi bwalu anyi? Bikaadi bintondè nciyiku mwà kuBitwàla kabidi to.” Plop, plop, plop, plop, nyéyè uyààya wàwa.

170 Inàbànzà nyòka wa kale awu neàjuulè mutù, wàmba ne: “Èè, udi mumanyè mùdi bwalu anyi? Bòbò ànu bayiishè mùshindù awu, bàlwisha divwàlà dyà tùpùtulù ne bikwàbò, aci necingipàtè mémè. Pa nànkù nénditòlè ne musumbà wà bansantu babùnguluki bàà mu malaba wàwa. Ki cyònsò cìvwa ne cyà kwikalakù.” Wèwè ùvwa nyòka, ànu kwinë kwònsò aku. Ncyà bushùwà menemene. Èyowà.

171 Kàdi ki mukalenge cyulà wa mbòso udi mubòdyàme apa ewu, ne cifwankà cinène aci ku mishiku, mwenzè bu ngombe wa mu Texas mutùùla nsèngù, neikalè mwimàne pààpa ùkènzakana, wàmba ne: “Èè, kacya dinwà dyà mfwankà kaditukù dimpiishe to. Mémè's nêmpatukè ànu mu cintàkanyì eci, ànu patùdi twakulangana apa.” Èè, wèwè ludimbà wa kale ewu, s'ki cyùvwa, ànu kwinë kwònsò aku. Ncyà bushùwà menemene. Ncyà bushùwà menemene.

172 Ngiikàdilù webè's ngudi ujaadika cyùdi. Nsòmbelu webè ngudi uleeja, ùleeja patòòke cyùdi, kacya ànu ku cibangidilu aku. Kí mbikolè bwà mémè kumòna aci to. Kí mbikolè bwà wèwè kucimòna to.

173 Bu mèmè mwà kuya kwà Roy Slaughter cidimè udi musòmbè kaaba aka ewu, ne mmòna ngulube pa mushikì wà tùmvi twà nyama, ùdya tùmvi twà nyama atu, ncyèna mufwànyine kudyàmbidila cintu nànsha cìmwè pa bwalu abu to. Yèyè's nngulube. Kàdi mèmè mumòne mwànà wa mùkòòkò pa mwinè mushikì wà tùmvi twà nyama awu, s'ndi mufwànyine kukèma. Uh-huh. Nwamònu anyi? Kùtácishi meeji nànsha, kwàkumumònapù to. Yèyè kènà ànu mufwànyine kucitwàla to. Ncyà bushùwà.

174 Nènku muntu udi mulediibwe kùdi Nyumà wa Nzambi ùdi yèyè ùkìna bintu byà pa buloba. Ncyà bushùwà: "Bwalu wèwè munangè maalu a pa buloba anyi bintu byà pa buloba, dinanga dyà Nzambi kadyèna nànsha mene munda mwèbè to."

175 Mèmè ngenda masandi ne bakàji ditùkù dyònsò, ne ngaalukila kumbèlu, nkambila mukàjàànyì mùndì mumunangè, yèyè's mmufwànyine kumanya ne ndi mwena mashimi. Byenzedi byànyì's mbifwànyine kwakula ne òyì dikolè kutàmba mèyì àànyì. Bushùwà's. S'ndi mmujaadikila ne ncyèna mumunangè, bwalu ncìwva ne lulamatu kùdiye to.

176 Yèyè mungambile mùdiye munnangè, kàdi musangu wònsò wùndì mufwànyine kwikala muumùke, yèyè kupàtuka kudyèla ne muntu kampànda mukwàbò, s'ncifwànyine kujaadika ne yèyè kì mmunangè. Cyà bushùwà's. Byenzedi byèndè's mbìdì bìcijaadika. Nànsha yèyè muteetè kungambila ne: "Bill, ndi mukunangè, ne kakwènakù mukwàbò muntu pa buloba to pa kuumusha wèwè," s'ndi mufwànyine kumanya ne yèyè mmwena mashimi.

177 Nènku paùdì uteeta kwamba ne: "Mukalenge, ndi muKunangè," kàdi mwikàle wenza bintu byà pa buloba, Nzambi's mmumanyè ne wèwè udi mwena mashimi, ànu kwìnè kwònsò eku. Pa nànkù mbwà cinyì? Bìdì ne dikwàcisha kaayi bwà kwitaba dilabula dyà kale dyà citùpà, ne cintu cikwàbò cyà mùshindù awu, pàdì maulu manèna a Dyulu mùle tètè ne cintu cilelèlà? Bwà cinyì udi muswè kwikala mwena Kilistò mukèngeledi, wa ku mishikù, wa mushiikile mu njila, kàyi mubobesha, wa ku dìnà? Pàdìbi ne, udi mwà kwikala mwànà wa Nzambi mulediibwe cyàkàbìdì menemene, ne tungonga twà disànka twà mu Dyulu tùdila munda mwà mwoyi wèbè, ucyònkómoka, ne utùmbisha Nzambi, ne mwikàle ne nsòmbelu wa bucimunyi ku Yesù Kilistò.

178 Kùyi uteeta bwà kudyènzèlaci wèwè mwinè to, bwalu's wèwè neùpangilè, twamb'eku twamb'eku. Kàdi mwangàtè Yèyè, N'Dìyì Dyèndè, ne shààla pa cìdìYe mwambè ne m'Bulelèlà aci. Ne Mwitàbùjè, ne Munangè, nènku Yèyè neènzè bwà maalu ònsò kwendawù bilenga bwèbè wèwè. Ki cyòci aci. Ki mmwènenu nyèye awù.

179 Mukalenge ànùbènèshè. Ncyêna muswè kukutàndisha to, kàdi, mwanèètù, mbitàmbe bwímpè kupetakù ndambù wa ditàndishiibwa's. Nwênù nudi bankòngà bàanyi. Nwamònu anyi? Ne papa kanà yònsò ewu udikù munangè bânà bèndè's ùdi ùbàlongolola, cyanaàna kî m'papa wa mùshindù mujaalàme nànsha. Ncyà bushùwà anyi? Ncyà bushùwà. Ne papa ewu ùdi ne kanungu ànu kàmwèpelè, ne nkanungu kàà kumbèlù. Ne Nzambi ùdi ne kanungu ànu kàmwèpelè, n'Dìyi Dyèndè.

180 Twètù biitàbùùje Dìyi Dyèndè, díbà adi netwìkalè ne mwoyi ku Dìyi Dyèndè. Kì wètù mudimu, piikalàbi ne tukààdikù batwilàngàne ne Nzambi. Kì mbwalu udi wamba ne: "Èè, mèmè ntu nya mu èkèleeziyà, nènku bikèngela ngènze *cikampànda*" nànsha. Udi mwena dikènga. Kwènji nànkù to. Bwà cinyi udi muswè kwikala cikòlolò cyena dikènga, cipuuyile, kaciyi cyà cijila, paùdi mufwànyine kwikala nkuci? Bushùwà's. Bidi bikèngela ànu bwà kushintulwisha ngiikàdìlù webè cyanaàna. Nènku udi ushintulula ngiikàdìlù webè, ulwa mwànà wa balùme ne wa bakàji wa Nzambi, ushààla mu ditalala ne Nzambi.

181 Yesù! "Kì bwà cinyi Yesù pèndè, bwà Wàmòna mwà kujidila cisàmbà ku Mashi Èndè Sungasunga, wàkakèngela pambèlù pàà biibi," Ebèlù 13.12 ne 13. Loomò 5.1: "Kì bwà cinyi babingishiibwe ku diitabuuja," kakùyi ku dilabulangana dyà ku cyanza, kakùyi ku dibàtiiza dyà mu màyi, kakùyi ku ditentekelangana dyà byanza, kakùyi ku dyela dyà mbilà, kakùyi ku dyakula dyà mu myakulu, kakùyi ku disaluka kampànda nànsha. "Kàdi biikàle babingishiibwe ku diitabuuja, tudi ne diikisha ne Nzambi ku Mukalenge wetù Yesù Kilistò." Tudi buumùke ku lufù bayè ku Mwoyi, ne balwè bifùkiibwà bipyabipyà, bwalu tudi biitàbùùje Mwànà wa Nzambi mulèla umwe, ne baMwitàbe bu Musùngidi wetù sungasunga. Ne Mashi Èndè àdi àkwàta mudimu, dilòdòlò edi, bu mulambù wà kujìmija naawù mpèkaatù wetù, bwà kwangata kaaba kèètù.

182 Mu Dipungila Dikùlukulu, kùdi mwaba ànu wùmwèpelè wà kwenzela bwobùmwe, mmwinshì mwà mashi. Bìvwa bikèngela bwà mwena kwitabuuja yònsò kulwayè mwinshì mwà mashi. Pàvwa ngombe wa lukùngùlù mukúnze ùshipiibwa, ùvwa wènjiibwa bwà mulàmbù wà mpèkaatù. Ùvwa ne cyà kwikala mukúnze. Nènku nshapìtà wa 19 wa Ekèsòdè, piikalà ní nganyì wa kunùdi muswè kucibala. Ne ùvwa ne cyà kwangaciibwa yònsò, ne bikònò, ne byònsò, byòshiibwa pàmwe. Ne pashiishe bìvwa byènjiibwa màyi à ditàpulula. Bìvwa bitèekiibwa pambèlù pàà biibi. Bìvwa bikèngela kukwàciibwabì ne byanza bikezùke. Mashi a ngombe wa lukùngùlù ewu aa àvwa àya kumpàlà... kùdi disangisha, ne atuuciibwa misangu mwandamutekète kumutù kwà ciibi. Nènku mpindyewu, muntu yònsò mukooyike uvwa useemena awu, ùvwa dyàmbedi ne cyà kujingulula ne kumòna mashi awu, ne kumanya ne kùdi bwobùmwe ànu mwinshì mwà mashi awu. Kì mwaba wùmwèpelè wùvwàku

mukuukwidi mwà kukuukwila mu bulelèla ne byà bimanya kùdì bònso, mùvwa mmwinshì mwà mashi.

¹⁸³ Pashiishe, cintu cyà kumpalà cìvwa cìkèngelà kwenzayè, kumpalà kwà kulwayè mwinshì mwà mashi, bìvwa bìkèngela kwikalè mâyi a ditàpulula aa mamumyamina, nènku uvwa kâyi mukezula awu ùvwa ùvwijiibwa mukezùke.

¹⁸⁴ Nènku bàvwa bàngata mâyi a ditàpulula awu bààmuyamina mwena lwendu awu, ne bàvwa bàmutàpulula ne mpèkaatù yèndè. Nènku dîbà adi ùvwa wèndela mwinshì mwà tushoonyi mwandamutekètè twà mashi atu, ne ùvwa ùbwela mu bwobùmwe ne bakwàbò beena kwitabuuja abu mu Bwikadi bwà Nzambì.

¹⁸⁵ Kùdì mùshindù ànu wùmwepelè wà kucyènza. Kí ndilabulangana dyà ku cyanza, kí ndiya kashàala wa mu èkèleeziyà kampànda, kí nku mabàtiiza, kí nku masaluka to; kàdi seemènà too ne ku mâyi a ditàpulula, tentèkà byanza byèbè, ku diitabuuja, pa mutù wà Yesù, wàmbè ne: “Ndi ngènzàmpèkaatù, kàdi Wèwè wàkafwà pa kaaba kàanyi. Ne Cintu kampànda mundà mwànyì nyewù cingambila ne Wèwè neùmfwilè luse ku mpèkaatù yànyì, ne ndi nKwitaba mpindyewu bu Musungidi wanyì sungasunga.” Endèlà mwinshì mwà Mashi, mwàmwa, bwelà mu bwobùmwe ne bânà bàà Nzambì. Kì cyòci aci. Dyàku dyàmpà, nwàku mvinyò, ne bwelà mu bwobùmwe ne èkèleeziyà.

¹⁸⁶ Kaa, Yèyè kí ngwa ùkèmesha anyi? Yèyè kí mmwìmpè anyi? Mpindyewu, eci cidi mwà kumwèka cyà pabwàci kùdì, mulundà wanyì. Kàdi cìndì mwimànyine kaaba aka ngamba maalù aa ncinyi—ncinyi? Ndi mufwànyine kuàmba bwà kuteeta kudìvwija mushiilàngàne ne mukwàbò muntu kampànda anyi? Mèmè ngenza nànkù, dîbà adi bikèngela nyingalalè. Ndi nCyàmba mbwalu Nzambì mmuCyàmbè, mbwalu N'Diyi dyà Nzambì. Kàdi tèelejàayi. Nekùlwe cikondo, ne ki cyòci eci mpindyewu, cìikalà bantu bùumuka ku esètè bàya ku wesètè, bàteeta bwà kupeta Dìyi dyà Nzambì, kàdi kabàyi mwà kuDipeta to.

¹⁸⁷ Paùdì ubwela mu disangisha kampànda, cintu cyà kumpalà cyùdì wenza, udi ubwelamù ne bàdi ne mushiki wà myakulu ne dyandamuna, ne muntu kampàdà ùjuuka ne ùtùngunuka ne kutèla Mifundu; ne aci ncyà musunya. Kakùyì mpatà to. Nzambì mmwambè ne “katwèna ne cyà kwenza dyambulula didi kadìyi ne mushinga to,” kàdi bìshi Bwèndè Yèyè? Yèyè mumanè kuCifunda musangu wùmwe, ùCitàbùùjè. Kabyèna bikèngela bwà kuCyàmbulululàYè kàbidi to. Myakulu ne dyandamuna bidi ànu bìmpè, kàdi bìkèngela cìikalè mukenji wà buludì mutùmina èkèleeziyà ne muntu kampànda, kí ng' ànu byà musunya ne bintu byà mùshindù awu nànsha. Ne pashiishe nudi nudìtwa mu bikwàbò bintu byònsò ebi.

188 Mwaba ewu ditùkù adi, bantu bàbìdì kubwelabò mu... mulùme ne mukàjèndè, ne mulùme mukwàbò ne mukàjèndè, bàcìfùminakù ànu ku disèlangana's, kubwelabò mu mwaba kampànda, bwà kuyabò mu Àfrikè bu bampandanjila. Muntu kampànda kjuukayè e kufila ciprófetà, ne kwakulayè mu myakulu ne dyandamuna, ne: "Bàvwa muntu ne muntu ne mukàjì wa mukwèndè." Ne: "Kabìvwa bìkèngela kwikalabì mùshindù awu to. Mbasèlàngàne ne muntu uvwa kàyì ukèngela to." Ki bantu bàbìdì abu kutàpulukabò ne kusèlululanganabò, cyàkàbìdì. Mulùme yònsò kwangatayè mukàjì wa mukwèndè, mukwàbò awu, mu dìngumba dinènè ne dimanyikè dyà beena Mpenta, ne kuyàbò ku Àfrikè bu bampandanjila.

189 Mwanèètù, paùdì wenza mucìpù wèbè, udi mwenzèjìibwe bwà kulama mucìpù awu too ne pààkusùlulà lufù. Cyà bushùwà menemene. Cyà bushùwà. Paùdì wenza mucìpù wèbè, wùdì wùkuswika.

190 Byònsò abi, ndukutukutu! Ne bikaadi bikafikè mu mùshindù wà ne panùdì nuya mu maèkèleeziyà, anyì mbyà mashika ne byà kwìsùkwìsù ne byùme, mu mùshindù wà ne kapiminu kàa luuyà lwà nyumà kàdì kàpweka too ne pa makùmi àtaanu mwinshì mwà cijèngù. Bantu mbashààle basòmbe ànu mùdì dipù pa cikuuku, benzàngàne ànu bu kabàyi ne disànka ne kabàyi bàcyùka maalu ne mpàla minyènga. Ne paùdì umvwa muntu kampànda, lwà paanyimà pààpa mu ditumba, mufwànyine kununganakù ka-"amen" kakesè, ku musangu ne ku musangu, ncyènzè bu cidì cibàsaama's, bònsò nebòòlolè nshìngù byenzè bu byòkosò, bwà kukènzakana, kumòna ne ncinganyi cyènzèkì aci. S'nudi bamanyè ne aci ncilelèlè. Ncyèna ngamba aci bwà kwela bilèlè to. Ewu kì mmwaba wà kwelela bilèlè to. M'Bulelèlè. Cyà bushùwà. Ndi ncyàmba bwalu m'Bulelèlè bwà Èvànjeeliyò.

191 Ne ku lukwàbò luseke, udi upeta mushikì wà lukutukutu wà mushikì wà masaluka a mu musunya kacya byàngatangana, ne ndekeelu wa byònsò Dìyì dilelèlè dyà Nzambi dikaadi dikafikè mu mùshindù wà kùyikù mwà kuDyùmvwa to: Èvànjeeliyò wa kale, wa munkacì mwà cibeeba awu, Bukènkè bwà mu kajila kàànyì, àlèluuyàh, Mashi a Mwànà wa mùkòòkò, dinanga dyà Nzambi didì ditùtápululà ne bintu byà pa buloba adi.

192 "Ukààdikù mwakùle mu myakulu anyì, mwanèètù? Kwéna muMupetè to. Ukààdikù mwelè mbilà too ne mùdì umvwa mashikà àkubànda mu mwongo anyì? Ukààdikù mumòne mabùlù a midilu anyì?" Kaa, macimbu's wè! Kakwèna cintu cyà nànkù to.

193 Witàbùùjì Mukalenge Yesù Kilstò ne wàMwitàbì bu Musùngidi webè sungasunga anyì? Nènku Nyumà wa Nzambì ùdì ùfìla bujaadiki pàmwè ne nyumà wenù ne, nudi bânà bàà balùmè ne bàà bakàjì bàà Nzambi. Ne nsòmbelu webè ùdì ùkwàma mamuma a dinanga, disànka, ditalala, mwoyi mule,

bwímpè, bupòle, musàngèelu. Dìbà adi udi mwena Kilstò. Kabiyi nàнку to, cyùdi wenza nànsa ciikàle cinyi.

Pòlò mmwambè ne: “Ndi mufwànyine kufila mubidi wànyì bwà kwoshiibwawù bu mulàmbù. Mumanyè maalu masokoka ônsò a Nzambì. Ndi mwà kutùntumuna mikùnà ku diitabuuja dyànyì. Ndi mwà kwakula mu myakulu bu bantu ne Banjèlo. Ndi cintu cyanàànà.” Bwà aci bìdi bishi? Kolintò wa Kumpàla 13; jandùlàbi Aci ní ncyà bushùwà anyi to.

¹⁹⁴ Mpindyewu jandùlàbi ní—ní Kolintò, Kolintò Mwibìdì 13, ngeela meeji ne nyèyè. Anyi, èè, anyi n’Kolintò wa Kumpàla anyi m’Mwibìdì. Kolintò wa Kumpàla mwaba awu, Kolintò wa Kumpàla 13, ki yèyè. “Nànsa ngaakula mu myakulu yà bantu ne yà Banjèlo,” mishindù yònsò yibìdì yidìbo mwà kwandamuna ne yidìbo kabàyi mwà kwandamuna, “ndi cintu cyanàànà.” Pa nàнку bìdi ne dikwàcisha kaayi bwà kujìmija naabi dîba, dîbà adi?

¹⁹⁵ “Nànsa mèmè ngumvwa maalu masokoka ônsò a Nzambì.” Cyùdi uyiila ku maasèminèrè bwà kateeta kuyiila bintu búngibì nàнку ncyini? S’mbímpè wèwè kwanji kudìlongolola ne Nzambì, dyàmbedi. Cyà bushùwà’s. “Nànsa ngamba ne: ‘Kaa, àlèluuyàh mubènèshìbwe’s wè!’”

¹⁹⁶ Udi mufikè too ne mu mùshindu wà kùyì nànsa mwà kupeta disangisha to paùdì kùyì mwenzè kàpanyè kàà dyondopa anyi bishimà byà mùshindù kampànda byenzèke. “Lukòngò lwà butekètè ne masandi lùdi lwènda lùkèbangana ne byà nàнку.” Cinùdì nukèbela biinè abi ki cinyi?

¹⁹⁷ Pòlò wàkamba ne ùvwa mwà kwenza bintu byà mishindù yònsò, nànsa mene kutùntumuna mikùnà, kàdi kwikala ànu cintu cyanàànà. “Mwaba wùdì myakulu, neyiimanè. Mwaba wùdì dimanya, nedijiminè. Mwaba wùdì biprofetà, nebipangilè. Kàdi pààlwà cidi cipwàngàne aci, necìshaalè kashidi,” ne dinanga ki bupwàngàne. “Nzambì wàkatàmpa kunanga bàà pa buloba, mu mùshindù wà ne Wàkafila Mwan’Èndè mulela umwe, mbwà ne,” ewu yònsò udi uzakala, ewu yònsò udi unyùkuka, ewu yònsò udi wakula, ewu yòns-...anyi? “ewu yònsò udi uMwitabuuja kàfu to, kàdi ikalè ne Mwoyi wà Cyendèlèlèè.” Itàbùùjaayi aci, nwènu bàna.

¹⁹⁸ Bòbò mbaswè kucìvwija cikòdyàkàne menemene, bintu *kampànda* ne bintu *kansanga*. Pààbì’s, s’bìdì bikoobeka ànu ku cintu cìmwèpelè: diitabuuja dyèbè sungasunga mu Nzambì. Ki cyôci aci. Aci neidi cìcyàmba. “Bwalu ku diitabuuja,” kakùyì ku dilenga to. “Ku diitabuuja,” kakùyì ku divwayila dya mubidi to. “Ku diitabuuja,” kakùyì ku disaluka to. “Kàdi ku diitabuuja nkunùdì basùngidìibwe; ne ciinè aci nku...” Mbwalu udi mukèbe Mukalenge anyi? Mbwalu uvwa muntu mwímpè anyi? Bwalu: “Nzambì, ku ngàsà, ùkaavwa mudyànjile kunùmanya ne munùlongòlòle ku Mwoyi wà Cyendèlèlèè.”

199 Yesu wàkamba ne: “Muntu nànsha umwe kèna mwà kulwa kûNdi pàdi Taatù Wanyì kàyi mumukòke to. Ne ewu yònsò udi ulwa kûNdi, Mèmè nèmmpupèèshè Mwoyi wà Cyendèlèlè. Muntu nànsha umwe kèna mwà kubànyènga mu cyanza Cyànyi to. Mbàànyi Mèmè. Mbasungidiibwe kashidi. Mèmè ngudi naabò. Muntu nànsha umwe kèna mwà kubànyènga mu cyanza cyà Taatù Wanyì to, ne Yéye Ngudi mubàMpèèshe. Bàdi mapà Àànyi a dinanga.”

200 “Ne bònsò bàakadyànjlàYe kumanya, Wàkabàbìikila.” Yéye kèna ùbìikila muntu nànsha umwe pàvwàYe kàyi mudyànjlè kumumanya to. “Bònsò bàakabìikilàYe, Wàkabàbingisha; bònsò bàakabingishàYe, Wàkabàtùmbisha.” Pa nànkù, nudi numòna’s, tudi ànu mu diikisha dipwàngàne.

201 Mpindyewu, ndi mumanyè ne kùdi beena ne ànu mikenji kaaba aka bungi cyanààna, makùmi citèemà ne citèemà pa lukàmà bàà kunùdi. Kàdi, tàngilààyi, bu nwènu ànu mwà kwangatakù Eci ne kumanya ne ncyèna nteeta bwà kunwàmbila cintu kampànda to.

202 Dìbà adi wèwè udi wamba ne: “Èè, Mwanèètù Branham, pàànyi’s ntu ànu ndyàmbedila ne bìvwa bìkèngela mèmè kwenza *cikampànda* ne bìvwa bìkèngela mèmè kwenza *cikansanga*.” Kùdi dishiilangana dinène be—be mu cyòci aci, mwanèètù, cìdi cikèngelà bwà wèwè kwenza ne cyùdi muswè kwenza. Udi musungidiibwe, kì mbwalu uvwa ne cintu nànsha cimwè cyà dyanamù to. Udi musungidiibwe mbwalu Nzambi wàkakusungila kumpàlà kwà difùkà dyà dyulu ne buloba.

203 Tèèlejààyi, tèèlejààyi kùneeku. Bible mmwambè, mu Bwàkabuulwibwà, nénye neenù kuumuka ku ntwàdijilu too ne ku ndekeelu mpindyewu, Bible mmwambè, mu Bwàkabuulwibwà, ne, pàkalwà nyama wa lwonji: “Wàkaseeswisha bònsò pa buloba,” nyama wa lwonji ngwàkenza nànkù, “wàkaseeswisha bònsò pa buloba, beena mènà àvwà kaàyi mafùnda mu Mukàndà wà Mwoyi wà Mwànà wa mùkòòkò.” Kacya ditàbuluja dyàbanga, aci cìdi cyùmvwika mu cyòci anyi? Èè, kacya muyiishi wàyiisha diyiisha dyà bukolè adi anyi? Kacya muntu awu wòndopiibwa anyi? “kacyà ku difùkà dyà dyulu ne buloba.”

204 Yesù wàkashebeyiibwa penyi, ku Kàlvariyo anyi? To, mukalenge. Yesù wàkashebeyiibwa kumpàlà kwà difùkà dyà dyulu ne buloba. “Mònaayi Mwànà wa mùkòòkò wà Nzambi, wàkashebeyiibwa kumpàlà kwà difùkà dyà dyulu ne buloba.” Nzambi, ku cibangidilu, pàakamònaYe mpèkaatù, Wàkamòna cyàkenzekà aci, Wàkamba Diyì. Nènku Yesù wàkashebeyiibwa kumpàlà kwà difùkà dyà dyulu ne buloba. Ne muntu yònsò utu musungidiibwe ewu, wàkasungidiibwa, bilondèshile Bible, pàkashebeyiibwà Mwànà wa mùkòòkò mu meeji a Nzambi, kumpàlà kwà difùkà dyà dyulu ne buloba. Wèwè wàkabadiibwa

mu lupàndu dībā adi. Pa nàнку ciwikalà mwà kwenza bwà Cyòci aci ncinyi?

²⁰⁵ N’Nzambi. Dìna dyà Mukalenge dibeneshiibwè! “Nzambi ngudi ukwàta mudimu; kí ng’ewu udi muswè anyi udi unyeema to, kàdi Nzambi ngudi uleeja luse.”

Piikalàbi ne Yesù wàkasheyiibwa kumpàlà kwà difùkà dyà dyulu ne buloba, s’byàkakèngela bidimu binunu binaayi kumpàlà kwà kwenzekaci mu bulelèlè. Kàdi pààkacyàmbà Nzambi mwinè musangu awu apu, Dìyi dyònsò dyà Nzambi ndishimate. KaDyèna mwà kushintuludiibwakù to. KaDyèna mwà kukòsolodiibwa to. KaDyèna mwà kupangilakù to. Ne pààkashebeyà Nzambi Mwànà kumpàlà kwà difùkà dyà dyulu ne buloba, Wàkashebeyiibwa byà mwomùmwe ànu ne mwàkasheyiibwàYe ku Kàlvaryò amu. Ncintu cijikija, pàdi Nzambi wamba nàнку. Ne vùlukà ne, pààkashebeyiibwà Mwànà wa mùkòòkò, lupàndù lwèbè lwàkabadiibwa mu mulàmbu awu, bwalu Bible mmwambè ne dīna dyèbè “Dyàkafundiibwa mu Mukàndà wà Mwoyi wà Mwànà wa mùkòòkò kumpàlà kwà difùkà dyà dyulu ne buloba.”

Bwà aci udi wamba bishì? Dībā adi citwikalà twètù mwà kwenza ki cinyi? Nzambi’s ngudi uleeja luse. Nzambi’s ngudi mukubiikile. Nzambi’s ngwàkakusungula mu Kilistò kumpàlà kwà difùkà dyà dyulu ne buloba. Yesù wàkamba ne: “Nwènu kí mbàdiku—nwènu kí mbàdiku baNsungùle to. Mèmè ngudi munùsungùle. Ne Mèmè ngwàkanùmánya, kumpàlà kwà difùkà dyà dyulu ne buloba.” S’ki bwalu abu’s.

²⁰⁶ Pa nàнку, nwamònu’s, aci’s cidi cyùmusha bwòwà mu wèwè. “Kaa, ndi ndikonka ní ndi mufwànyine kutùngunuka ne kushààla mukwàte? Nèmfikè, Nzambi àbeneshiibwè, bu mèmè ànu mwà kutùngunuka ànu ne kushààla mukwàte.” Kí mnè ní ngaatùngunuka ànu ne kushààla mukwàte, anyi to. Bidi ne Yèyè ní ùvwa mushààle mukwàte, anyi to. Ncidi—ncidi Yèyè mwenzè, kí ncìndi mèmè mwenzè to. Ncidi Yèyè mwenzè.

Mùvwàbi mu mukenji wà bupikudi. Aka nkantu kakesè kàndi muswè kwamba kumpàlà kwà kujikija.

²⁰⁷ Anjì ambàayibi tǔng bu kabalù kakàji kalelè kampundu kakesè? Ne kampundu kakesè aku kiikàle ne maci ònsò àbidi manyekàme panshì. Kiikàle ne mèsù a bulèngù, ne binù bikòyòbòke, mikòlò myenzè bibèndà. Mukilà wàkù mutàngija buludì mu lupeepèle. Nnyama kaayi wa mmwènekulu wa wùkwàcisha bwòwà’s wè! Mòna’s, muntu kanà yònsò ewu... Bu kampundu kakesè aku kafwànyineku kwela meeji, kwamba ne: “Mpindyewu, anjì indilà kakesè. Pààpàtukàbo mu nzùbù mu dīndà emu, nyawù nkwàmbila’s, ncyà bushùwà ne nebàmbòkòtè mucì ku mutù. Bwalu, kacya bòbò kabàtukù bàmpèèsha cyàkudyà to. Mòna mùndi kaacintu kàà mmwènekulu wa wùkwàcisha bwòwà. Ncyènàku nànsha mene ne mpùngà to.”

208 Èè, aci's ncyà bushùwà. Wèwè kwèna ne mpùngà to. “Èè, ndi mulediibwe pa buloba ebu, kàdi anjì mònaakù ànu mündì cintu cyà mmwènekèlu wa wùkwàcisha bwòwà. Pa nàнку ncyà—ncyà—ncyà—ncyàdyakupetakù mpùngà to. Ncyàkukùmbanàkù to. Ncyèna mwà kwangulakù mpasu to.” Nwamònu anyi?

209 Kàdi bishi bu mamwàkù mwà kwikala bushùwà mulongesha mu mikenji? Neámbe ne: “Mwanàanyi, aci's ncyà bushùwà. udi ne mmwènekèlu mubi be, ne wèwè mwinè kwèna mukùmbànyine nànsha kudyà cyàkudyà cyà buloba ebu to. Aci ncyà bushùwà. Kwèna mukùmbànyine to. Kàdi, mwanàanyi, nànsha nàнку, wèwè ki wanyì mwanàabutà. Kàbìdi, udi mumanyè's, wèwè ngudi mulediibwe ne bwanàabutà. Kàdi mwakwidi yèyè kàakukumònakù to. Kàdi, bwà dínà dyèbè, bikèngela kwikalè mwànà wa mùkòòkò udi kàyì mwenzè bwalu kàyì kalèma to, wìkala ne cyà kufwà pa kaaba kèèbè, bwà wèwè wìkalè ne mwoyi.”

210 Èè, kampundu kakesè aku's nkafwànyine ànu kukùpa tukònò atu muulu ne kucyònkómoka. Cidìku kòkò aci kacýèna ne cidìci cishintulula to, bwalu kabàakukàmònakù kùdi mulumbulwishi, mwakwidi awu to. Mwànà wa mùkòòkò ngudi mwakwidi ùtàngila. Kí nkampundu aku to; mwànà wa mùkòòkò awu!

211 Nèнку Kilistò ngudi Nzambi ùtàngila, kí ngwèwè to. N'Kilistò. Pa nàнку pìikalàku kakùyì cilèma mu Yèyè to, nekwikalè cilèma munyì? Mmunyì mùdiYe mwà kwangula cilèma, pìikalàbi ne wèwè udi mufwè ne mwoyi wèbè mmusokoka mu Kilistò kupìcila ku Nzambi, mutwà citampì kùdi Nyumà Mwímpè? “Ewu udi mulediibwe kùdi Nzambi kèna wènza mpèkaatù to, bwalu yèyè kèna mwà kwenza mpèkaatù to.” Mmunyì mùdiye mwà kwenza mpèkaatù pàdi mulàmbù mupwàngàne mutèèka pa kaaba kèndè? Nzambi kèna ùtàngilakù mèmè nànsha, Ùdi ùtàngila Kilistò, bwalu twètù tudi munda mwà Kilistò.

212 Mpindyewu, mèmè munangè Kilistò, nèngiikalè ne mwoyi pàmwè Nendè. Kàvwakù mufwànyine kumbweja Yèyè kàyì mumanyè to. Bu Nzambi mwà kunsungila leelù ewu, eku mumanyè ne Ùvwà mwà kunjìmija paanyimà pàà mbingu yisambòmbò kuumukila ku leelù, Yèyè's ùdi munkaci mwà kunyangakaja kiipàcilà Kèndè Sungasunga. Cyà bushùwà's. Dìbà adi Yèyè kí mmumanyè nànsha mene matùkù àcivwawà to, bu Yèyè munsungile, mumanyè nàнку. Yèyè mmwanjì kuswà bwà kunsungila bwà cinyi, Pèndè mumanyè ne neànjimijè? Nzambi kàtu kushà bintu, pashìshe kubyùmusha mu mbingu yibìdi to, bwà kushàala mulamàte ku mlayì Wèndè. PàdiYe ùkusungila, mbwà cikondo ne Cyendèlèlè.

213 Mpindyewu, udi mwà kwikala musalùke, wamba ne: “Kaa, èyowà's, Nzambi àbeneshiibwè! Alèluuyàh! Mèmè ntu mwakùle

mu myakulu. Ntu mwelè mbilà. Ndi naaci. Àlèluuyàh!” Aci kî mbwena kwamba ne udi Nendè to. Kàdi, mwanèètù, pàdì Cintu kampànda cipweka kwinsihì *eku*, ne wèwè wela lwongò mu Kilistò, dîbà adì's mamuma a Nyumà àdì àkushìndikija. Tudi tufila bujaadiki, nyumà wetù pàmwè ne Nyumà Wendè ne, tudi bânà bàà balùme ne bàà bakàjì bàà Nzambi. Bu nwènù mwà kuswà petàayi Aci, nwènù balundà bàanyi.

²¹⁴ Nènshaalè munùlamè kaaba aka bufùkù bujimà, ngaakula pa cyôci aci. Mémè ndi muCinangè. Ndi munùrangè. Nèngàalukilè ku kaatabernacle kakesè aka, ku musangu ne ku musangu, bu Nzambi mwà kulama mwoyi wànyì. Ndi muswè kunòmòna beelè miji ne bajaamè mu Dìitabuuja dyà cijila adi. Ncyèna muswè kunòmòna, batànkàkàjìbwe kùdì kaalupeepèlè kònsò kàà dilongesha, kàdì kàlwa, ne kànùnyungisha, ne bantu bàtùngunuka, ne biikàle ne ndambù wa mashi mu byanza byàbò, anyì ne ndambù wa mashika makolè mu mpàla, anyì cintu kampànda nànsha, ne bàòmòna makènkè a—a—a mùshindù kampànda kumpàla kwàbò, ne cintu cyà citù cyà—cyà mùshindù kampànda, mùdì Bible mwambè ne: “Mùle tètè ne maditàmbishì mu mwoyi, pèndè kàyi ne cidiye mumòne.” Ncyà bushùwà's. Ndi muswè nwikalè bashìndàme pa Dìyi. Piikalàci EMU MMÙDÌ MUKALENGÈ WÀMBA, shààlaayi naaCi, ikàlàayi ne mwoyi ku Cyôci. Ki Ulimà-Tuumimà wa ditùkù edi. Nzambi mmuswè bwà nwikalè ne mwoyi ku Cyôci aci. Cyôci kaciyi mu Dìyi to, dîbà adi cipwayi mwoyi. Ikàlaayi ne mwoyi bwà Nzambi, ikàlaayi ne mwoyi bwà Kilistò.

²¹⁵ Ne mwoyi wèbè wòwù mubangè kupàmbuka, udi umanya ne kùdì cintu kampànda cyenzèke, alùkilà ku cyoshelu wàmbè ne: “Kilistò, vwijùlùlaku dyànyì. . . disànkà dyà lupàndù lwànyì dipyadiyà. Mpèèshèku dinanga dímvwà naadi kale wàwa adi. Nyewu dibangè kuzòlologa dipatukè, Mukalenge. Kùdì cintu kampànda cìndì mwenzè. Mvwijùlùlèku wa cijila, mwimàne. Éyi Mukalenge, kakwènaku cintu nànsha cìmwè cìndì mufwànyine kwenza to. Ncyèna mwà kulekela *cikampànda* ne kulekela *cikansanga* to. Ndi ntàngija mèsù Kùdì bwà ùbinguumushè, Mukalenge, ne mémè ndi muKunangè.”

²¹⁶ Nènku ùmukè ku cyoshelu aku, muntu mupyamùpyà mu Kilistò Yesù. Dîbà adi kabyàkukèngela bwà wèwè kwikala mweyèmène èkèleeziyà wenù, mweyèmène nsaserdose wenù, mweyèmène mpaasàtà wenù to. Udi wèwè weyemena Mashì meela panshì a Mukalenge Yesù. “Ku ngàsà nkunùdì basùngidìbwe.”

Tùsambilàayi.

²¹⁷ Mukalenge, malongesha makolè a mùshindu awu! Dîbà dyàkànyì bwà kaèkèleeziyà kakesè aka kààmònakù mwà kudyà cyàkudyà cìkolè, kabìciyi kabìdì mabèèlè a Dìyi nànsha. Mpinyewu twatàmbi kushàala mu mabèèlè be, tupèesha mwàna

wa mu dibòkò kandundu kèndè kàà dinwina mabèèle aku. Kàdi bìdi bikèngela tupetèku byàkudyà bikolè, bwalu ditùkù dikaadi dyènda dìseemena. Bikondo binènè byà njiwù bìdi pabwìpì, ne ntàtù mikwàbò yàbùngì yisanganyibwa mu njila. Ne tudi bamanyè ne kakwàkwikalakù bikondo byà bitàmbe bwìmpè to. Tudi bamanyè ne tukàadi ku ndekeelu. Bikondo nebitungunukè anu ne kwenda kubìpa too ne pààlwà Yesù, bilondèshile Mifùndu.

²¹⁸ Katwèna mwà kubàlayakù cintu nànsha cìmwè mu ewu mwoyi to. Kàdi mu mwoyi wùcìvwawwà, tudikù mwà kubàlaya Mwoyi wà Cyèndèlèlè ku Dìyì Dyèbè, bu bóbò mwà kwitabuuja Mwànà wa Nzambi ne kuMwitaba bu Mulàmbù wàbò wà kujìmija naawù mpèkaatù, bu Ewu Wàkiimana pa kaaba kààbò, bu Ewu Wàkangata mpèkaatù yàbò. Enzàku nàнку mpindyewu.

²¹⁹ Swàku bwà beena bupidyà bàlwe beena kwitabuuja. Swàku bwà bàlàki bàà mukana bàà mu èkèleeziyà, kaaba aka dilòòlò edi, bàtù balàkèlèke mukana pa ntèndeleelelu kàdi basòmbèle ànu mu èkèleeziyà abu, swàku bwà bàpetè dilabula ne Nzambi; bwà dinanga dyà dikèma dibwelè mu mwoyi yàbò, bwà bàdilè myadi bwà mpèkaatù yàbò, bàfwe bàfwilèmu ku cìdibo bóbò biinè, ne bàlediibwè cyàkàbìdi ku Nyumà Mwìmpè, ne biikàle bapòle ne bàà musàngèelu, ne dinanga, ne bùle tètè ne disànka ne mabènesha. Biikàle ne nsòmbèlu wa mùshindù wà ne, mbatwè mukèlè, byà bàfikisha bantu bàdi mu nyùngulukilu wabò ku dijinga kwikala bu bóbò. Enzàku nàнку, Mukalenge, bwalu tudi tulòmba nùнку mu Dìnà Dyèndè.

Nèнку ne mitù yètù miinyika.

²²⁰ Ndi ndikonka, dilòòlò edi, nì nkufwànyìnekù kwikala muntu kaaba aka, wàmba ne: “Mwanèètù Branham, bu ne bàvwa bampimè mu cipiminu cyà Nzambi pa dìbà adi, ncìvwakù, ncìvwakù, ncìvwakù mufwànyìne kwikala ne ngiikàdilù uvwa ukèngediibwa ùdi wamba dilòòlò edi awu to. Ndi muswè bwà wamvùlukakù mu disambila, bwà nshintululèku ngenzèlù yànyì yà maalu, ne Nzambi àbwelèku bwà ùmushè lukutukutu elu mu mèmè ne àmviwìjèku mwena Kilistò mulelèlè” anyi? Udiku mwà kwela cyanza cyèbè muulu bwà disambila anyi, paùdi, bu wèwè mwà kuswà? Nzambi àkubènèshè. Nzambi àkubènèshè. Nzambi àkubènèshè, paanyimà pààpa. Nzambi àkubènèshè. Nzambi àkubènèshè, mukalenge. Nzambi àkubènèshè, mwanèètù wa balùme. Nzambi àkubènèshè, mwanèètù wa bakàji.

Wa cijila, Wa cijila, Wà cijila, Mukalenge
Nzambi wa bilwilu.

Dyulu ne buloba mbyùle Neebè tètè,

Dyulu ne buloba bìdi biKutùmbisha,

Éyì Mukalenge Mutàmbe bunène wa mu

Dyulu.

Wa cijila . . .

221 Paùdì welangana meeji mpindyewu, usambila, paùdì udyùmvwà ne udi mupiiile, kàdi muswè bwà kwikala mujaalàme apu, udiku ànu mwà kwela cyanza muulu cyanàànà, wamba ne: “Nzambì, mvwijèku cìvwà cikèngela bwà mèmè kwikala aci” anyi? Nzambì àkubènèshè, inábànzà mutekète. “Nzambì, mvwijèku cìvwà cikèngela bwà mèmè kwikala aci.” Nzambì àkubènèshè, mwanèètù wa balùme, mwanèètù wa bakàji, wèwè, wèwè, wèwè *ewu*.

222 Ditùkù dikaadi difwa. Ndi mumanyè ne mbikolè, balundà bàànyì, kàdi mbitàmbe bwìmpè bwà kumanya Bulelèlà mpindyewu. Mpindyewu sambilaayi mu cimùmà mpindyewu.

Wa cijila, Wa cijila, Wa cijila, Mukalenge
Nzambì . . .

Yèyè ngwa cijila, nkààyendè.

. . . mbyùle Neebè tètè,
Dyulu ne buloba bìdi bìKutùmbisha,
Éyì Mukalenge Mutàmbe bunène wa mu
Dyulu.

223 Taatù wa mu Dyulu, pàkaadi díbà díbwela mu dilòlòlò apa, tunyuunyi tukünze mu cyàdi ntuküngwile mu mici pamwè ne bananga bààtù. Tunyuunyi tuyaaya twònsò ku maswa àtù. Nkuci yìdi yìbùùka muulu yìkiikila pa nshinga yà nzembu, kuulu, bwà nyòka kayiyitácishi bufùku to. Yìdi yìsòmba kuntwaku yìdila yitèdangana too ne mùdìyi yiya mu tulù. Ndekeelu wa byònsò díbà didi díbwela.

224 Dìngà ditùku netùkafikè pa diinè díbà adi. Díbwela dyà díbà nedyènzekè. Ncyèna mumanyè ne ndíbà kaayi to, Mukalenge. Kàdi kùdi bantu kaaba aka dilòlòlò edi bàdi batwìshìibwe ne mbapiiile, ne mbaswè kufika pa kiinè kaaba aku, mwàkafikàpu Lincoln pàkaavwàye ùpùnga ne lufù, kwambayè ne: “Nkùdimùnaayi mpàla nùmutàngijè kùdi díbà díbwela.” Ki kubangayè kwamba ne: “Taatù wetù Udi mu Dyulu.”

225 Mwàkambà Moody wa kale awu ne: “Ki lufù elu anyi? Ki dyànyì ditùkù dyà kwashiibwa kwà cifulu cyà butùmbi ndyòdi edi.”

226 Éyì Wa Cyendèlèlè, bàkidilèku ànu mpindyewu, ku diitabuuja, pàdìbo basòmbè mu nkwasà yàbò pààpa. Wèwè wàkookòlù ku mwoyi wàbò, mu nkwasà amu. Ki cyàbò cyoshelu ncyòci aci. Díbà dyà Wèwè kubààkidila ndyòdi edi, ànu mpindyewu. Utu mwambè ne: “Ewu udi ulwa Kùndi, Ncyàkumwipatakù to nànsha bishi.”

227 Nènku dìngà ditùkù pìikalà díbà díkaadi díbwela, mukàji anyi bàyendè mwimàne ku mwelelu wà bulààlù, ngàngàbukà myumùke miyè. Éyì Wa cijila, Wa cijila, cinyàànyà cilenga,

cyà kalolo aci, kumpàla menemene kwà díbà kubweladi aci. Patwikalà bafwànyine kuuuka e kwamba ne:

Dibwela dyà díbà ne Mutootò wà Dilòòlò,
 Ne dibiikila òmwè ditòòke tòò bwànyi mémè!
 Nènku swàku bwà kakwikadikù ditwà dyà
 mukèmù nànsha òmwè ku mukàlù aku to,
 Pàngààpàtukà nya mutàngile ku mbù apu.

228 Éyi Nzambi wa yààya, bènzelèku nànkù's pa díbà edi pàcìdìbo bindile apa, bindile bwà dibènesha dyà Nzambi kulwadi pambidi pààbò. Umùshàku cijji cyònsò, maalu ònsò a pa buloba, kùdìbo, ne fùkakù mwoyi mupyamùpyà munda mwàbò. Wèwè wàkamba ne: "Nèngùumushè mwoyi wà kale, nteekèmu mwoyi wà musunya. Ne Nèntèekè Nyumà Wanyi mu mwoyi awu, nènku bòbò nebèndelè mu mèyi ne mikàndù Yanyi ne nebàlamè mèyi Àanyi matùma." Bwalu, mmukenji wà dinanga, ne kaciyi bwalu butwènzeja to. Ngwà dinanga. Ne dinanga's didi ditwènzeja bwà kucyènza. Mbwalu butwènzeja bwà dinanga, bwà kutwènzeja. Mbwalu butwènzeja bwà kulonda dinanga. Nènku ndi ndòmba, Nzambi, bwà Wadipèeshakù mwoyi wònsò wùdi mwelè cyanza muulu dilòòlò edi awu.

229 Ne aba bàdi kabàyi beelè byanza byàbò muulu abu, swàku bwà bòbò mpindyewu, ku ngàsà, bèlè byanza byàbò muulu bwà kuKwitaba, ne kuujiibwa ne Nyumà Webè mu mùshindù wà bupòle, wà kalolo, wà mutùùje, wà didipwekesha ewu; ne bùùjiibwè ne ngàsà, bàpatukè kaaba aka bu muntu mushintùlùke. Mùshindù mwine wikalà nyuunyi mwà kwimba bishiilàngàne, mwikalà muntu yònsò mushiilàngàne, paanyimà pàà díbà edi's wè, Éyi Mukalenge Mutàmbe bunène wa mu Dyulu.

Wa cijila, Wa cijila, Wa cijila, Mukalenge
 Nzambi wa buloba.
 Dyulu ne buloba mbyùle Neebè tètè,
 Dyulu ne buloba bìdi bìKutumbisha,
 Éyi Mukalenge Mutàmbe bunène wa mu
 Dyulu.

230 Nwènù mpindyewu ne mitù yènù miinyika, nwènù bàvwa beelè byanza muulu bwà kunùvùlukabò mu disambila abu, nudikù nudyùmva bu ne Nzambi wàkùlù neenù mu mùshindù mpindyewu wà ne, kabiyi ku disaluka to, kàdi ànu cintu kampànda munda mwènù menemene amu, nudyùmva bu ne Nzambi wànùpèèshi Mwoyi wà Cyendèlèlèlè anyi? Udikù udyùmva bu ne neùpatukè mu èkèleeziyà dilòòlò edi bu muntu mushiilàngàne anyi? Nudikù mwà kwelulula byanza muulu dilòòlò edi anyi? Nzambi àkubènèshè, mwanàanyì wa balùme. Nzambi àkubènèshè, mwanèètù wa balùme. Nzambi àkubènèshè, mwanèètù wa bakàji. Nzambi àkubènèshè. Ncyà bushùwà. "Nèngùumukè mu èkèleeziyà ewu, dilòòlò edi, muntu

mupyamùpyà.” Bâna bàà mu mabòkò bàfùma ku dilediibwa mu Bukalenge bwà Nzambi.

²³¹ Cyènzèkì ncinyì? Ndi mumanyè ne nciibidilu bwà kulwa ku cyoshelu. Aci ncyoshelu cyà ba-Méthodistes, nciibidilu cyà ba-Méthodistes, mûndì njinga kwamba. Cyàkatèèkiibwa mu èkèleeziyà wa ba-Méthodistes, mu matùkù a John Wesley. Kacya kacìvwakù mu matùkù a Bible to. “Bûngì bwònsò bwà bààkiitabuujà abu bààkasàkidiibwa ku Èkèleeziyà.” Udi mwà kwitabuujila mwaba wònsò wûdi usanganyiibwa awu, mu budimi, mu mùsèèsù, nànsha penyì. Nànsha penyì, kakwèna dishiilangana nànsha, cìdi ne bwalu ngwitabè ànu Kilistò bu Musùngidi webè sungasunga. Ncyenzedi cyà Nyumà Mwîmpè cìdi cibwelà munda mwà mwoyi webè. Panùdi nuMwitabuujà, nuMwitaba, nuumùkù ku lufù nwâyi ku Mwoyi, ne nwâlu bifùkiibwà bipyaabipya mu Kilistò Yesù.

Kùmpiciku to, Éyi Musùngidi wa musàngeluu,

Mpindyewu juukilaayaaku kuulu.

. . . mwadi wànyì wà didipwekesha naawù;

Paùdi ubiikila bakwàbo apa,

Kùmpicikù mèmè to.

²³² Mpindyewu ndi muswè nsongàlùmè wa citende ne nsongààkàjì, ûndì mmòna ne mmukàjèndè wàwa, wèwè uvwa mwelè cianza muulu awu, ndi muswè wèlè cyàkàbidì cianza muulu paanyimà apu; mwanàànyì wa balùme, udi muvwàle kankooçi kakùnze wàwa, ne inàbànzà wàwa ne, mbiitàbe Kilistò bu Musùngidi wabò sungasunga. Nsongàalùmè udi musòmbe apa mu dikalù dyà balèma ewu, witàbi Kilistò bu Musùngidi wendè, ùmvù ne Nzambi wàmusùngidi. Ne bakwàbò paanyimà pààpa bàvwà beelè byanza muulu abu, byèlàayi cyàkàbidì muulu bwà bantu kunùmònabò, bàbwelè neenù mu bwobùmwè.


²³³ Bàlabùlaayikù ku byanza, muntu udi pabwîpì, mwimàne pàmwè naabò apu awu. Ambà ne: “Nzambi ànùbènèshè. Difika dilenga mu Bukalenge bwà Nzambi, mwanèètù wa balùme, mwanèètù wa bakàjì.” Bwelàayi mu bwobùmwè, ki citùdi baswè ncyôci aci. Nzambi ànùbènèshè. . . Labùlaayikù nsongàalùmè udi mu nkwasà ewu ku cianza. Mukalenge ikalèku nendè. Ncyà bushùwà. Tudi tukujingila difika dilenga mu bwobùmwè bwà Nyumà Mwîmpè.

²³⁴ Pawikalà kacya kùyikù mwanjì kubàtijiibwa, kàdi ujinga kubàtijiibwa, asà lwendu ùbandè kùneeku wàmбилè mpaasàtà nàнку awu. Ciinà cyà mâyi cidi mene ne mâyimù, dilòòlò edi, pawikalà muswè kubàtijiibwa. Byònsò mbilongolola. (Byòbì biinè ukààvwa mulongolole dibàtiiza anyì, pa kuumusha edi?) Kàdi ciinà cyà mâyi ncilongolola, pìikalà muntu muswè kubàtijiibwa. Bible mmwambè ne: “Nyingàlalaayi, yònsò wa kunùdi, nùbatijiibwè mu Dìnà dyà Yesù Kilistò bwà dilekelediibwa dyà mpèkaatù wenù, nènku nenùpetè kupà kwà

Nyumà Mwîmpè. Bwalu mulayi wùdi kunùdi ne kùdi bânà bèènú balela, aba bàdi kule, mu búngi bwónsò bwàbìkilàbo kùdi Mukalenge Nzambi wetù abu.”

²³⁵ Nudi baMunangè anyi? Elàayi byanza muulu. Kaa, Yèyè kí ngwa ùkèmesha anyi? Mukàndà wà Ebèlù ewu mmunùsànkishe bìshi? Nudi baWùnangè anyi? [Disangisha dìdi dyàmba ne: “Amen.”—Muf.] Èyowà. Bilenga be. Mpindyewu, Wówò’s ndilongolola dyà biléma. Kaa, Wùdi didimwija dyà dísù dikolè ne mMululàme, kàdi tudi banangè nàнку. Mùshindù awu ngutùdi banangè kwikala naaWù. Mémè ncyèna muswè kwikala naaWù mûngà mùshindù nànsha wùmwe to.

²³⁶ Mpindyewu, nudi nwitabuujà ne Pòlò ùdi ne bukòòkeshi bwà kuWùyiisha mùshindù awu anyi? Pòlò mmwambè ne: “Mwanjèlò yèyè mulwè ne muyiishè èvànjeeliyò mukwàbò, mulawu wùmulandàlè.” Ncyà bushùwà anyi? Pa nàнку tudi baMunangè ne mwoyi wetù wónsò.

²³⁷ Mpindyewu nèndombè mpaasàtà bwà kulwayè kaaba aka bwà katanci kakesè cyanààna, mwanèètù wa musinga wà búngi menemene awu, Mwanèètù Neville, nènku yèyè ngwìkala ne díyi dyà kunwàmbila. Nènku mpindyewu, bu Mukalenge mwà kwanyiisha, netùnùmònè mu diisàtù dilòlò, ne netùdilongòlòlè bwà kuya mwà Mwanèètù Graham Snelling bwà dilòlò dyà disangisha dijimà. Ne pashiishe bwà kuyiisha kaaba aka bwà kutùngunuka ne nshapìtà wa 7 ne wa 8, mu dilòlò dyà mu diisàtù dilwalwà edi. Mwanèètù Neville. 

EBÈLÙ, NSHAPÌTÀ WA MWANDAMUTEKÈTE 1 LUA57-0915E
(Hebrews, Chapter Seven ¹)

DILONDANGANA DYA MALONGESHA PA MUKÀNDÀ WA EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu dilòlò, mu matùkù 15 a ngondo wa citèemà, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org